



14
1544
156



14
1544
156

淡墨錄卷四

已未博學鴻詞五十八

綿州 李調元 萬村

康熙十七年吏部奉 上諭用博學鴻詞科敕內外
大臣各薦舉本京先是二年間 上厭薄八比 諭
內三院九卿於甲辰丁未兩科改換策論着以經濟
時務取士而廷臣粗率故習皆言古學不可卒辨仍
暫用八比以俟徐復因特開是科是年十一月初一
日大學士索額圖明珠奉 旨各大臣官員題舉才
學諸人疾全到之日考試其中恐有貧寒難支者交

14
1549
156

淡墨錄卷四

己未博學鴻詞五十人

綿州 李調元 禹村

康熙十七年吏部奉 上諭用博學鴻詞科敕內外
大臣各薦舉來京先是二年間 上厭薄八比 論
內三院九卿於甲辰丁未兩科改換策論着以經濟
時務取士而廷臣徂于故習皆言古學不可卒辦仍
暫用八比以俟徐復因特開是科是年十一月初一
日大學士索額圖明珠奉 旨各大臣官員題舉才
學諸人候全到之日考試其中恐有貧寒難支者交



與戶部酌量給與衣食用以副朕求賢重文之意戶部議酌給俸廩併柴炭銀兩按月稽領真贖典也至次年巳未正月晦日 上諭薦舉人員着二月初三日親試高陽李蔚奏時迫促不能預備試卷桌子等項遂 諭十六日啟奏時 幸溫泉回益都馮溥又簡入會闈作主文官未啟奏至十七日傳 諭着該部同翰林院確定試日並應用事宜具奏因定三月初一日遂於二月二十九日吏部過堂三月初一日平明齊集太和門以魚貫入詣太和殿前鴻臚唱行九叩頭禮畢 上御殿祭 堂子回命諸薦舉人

員赴東體仁閣下太宰掌院學士捧題出用黃紙十張上寫題二道放黃桌上跪領題訖用矮桌列下墀先是 上命內閣及各學士擬題上用李蔚擬璇璣玉衡賦杜立德擬省耕詩俱坐地作文及巳牌太宰掌院學士復宣 旨云汝等俱係薦舉人員有才學的原不必考試但是考試愈顯你們才學所以皇上十分敬重特賜汝宴凡是會試殿試館試狀元庶吉士俱沒有的汝等要曉 皇上德意宜訖命起赴體仁閣設高桌五十張每張設四高椅光祿寺設饌十二色皆大盃高攢相傳給直四百金先賜茶

通時菓四色後用饅首卷子紅綾餅粉湯各二套白
 米各一大盃又賜茶訖復就試時陪宴者太宰滿漢
 二員掌院學士滿漢二員皆南北向坐謂之主席以
 賓席皆東西向也餘官提調者皆不與焉其夕晚出
 者十餘人皆給燭竣事然後彌封諸試卷作四封當
 夜呈進 上先閱璇璣玉衡賦次日攜卷至霸州觀
 魚貯以黃卷箱十四日還宮十五日發卷出中堂三
 相公暨掌院學士恭閱十六日閱訖十七日啟奏呈
 繳照前代制科分等第進士科分甲乙例判作四等
 曰上上曰上曰中曰下 上諭前所試上上卷上卷

着入史館纂修明史餘俱遣回其年老者量加虛銜
 未到者不再試亦不必令來遂問有不完卷的何以
 列在中卷衆對曰以其贖詞可取也又問上上卷內
 有驗於天者不必驗於人語無礙否彭孫衆對曰雖
 意圓語方故無礙也又問有或問于予曰及唯唯否
 否語豈以或指朕予自指耶汪琬衆對曰賦體本有子虛
 亡是之稱大抵皆寓言似不必有實指也又問有女
 媧補天事信否毛西益都對曰在列子諸書有之似
 乎可信及拆卷 上又曰詩賦韻亦學問中要事何
 以都不檢點賦韻且不論卽詩韻取上上卷者亦多

出入有以冬韻出宮字者有以東冬韻出逢濃字者
有以支韻之旗誤出微韻之旂字者此何說也衆對
曰此緣功令久廢詩賦非家絃戶誦所以有此然亦
大醇之一疵也 上是之遂定爲五十卷上上卷二
十作一等上卷三十作二等餘中卷下卷分作三等
四等者總名爲下第不填榜內至拆舉因於上卷中
斥去一卷 上命擇一有名者補之時中堂掌院各
有所薦皆不允最後益都以徐咸清薦卽徐中山也
上曰有著作乎曰有資治文字若干卷 上曰資治
文字何書也曰字書也旁一學士曰字書小學耳遂

置不問後 上自取嚴繩孫卷補之卽前云中卷中
不完卷者二十四日 上諭禮吏二部這取中人員
該授何職着確議具覆時二部不諳舊制科例但擬
已仕者照現任品級或墜或加級其去任在籍者或
宜起用或宜在籍加銜一應未仕者俱授翰林院待
詔具覆 上命閣臣取前代制科舊例來閱查得兩
漢授無常職晉時授何書郎唐制策高者特授以尊
官其次等出身因之有及第出身之分宋制分五等
其第一等第二等皆不次之擢第三等始爲上等恩
數比廷試第一人第四等爲中等比廷試第三人皆

賜制科出身第五等爲下等賜進士出身 上乃降
旨這薦舉取中人員彭孫適等俱投爲翰林官應給
職銜着部議具奏其杜越傅山王方穀等文學素著
念其年邁從優加銜以示恩榮于是已仕者俱照品
級授講讀宮坊編修等其未仕者概授檢討總充明
史館纂修其杜越等俱授內閣中書正字銜回籍依議
乃擇四月二十日到任各朝服頂帶于欽天監火神
廟齊到衙門行禮畢次日遂赴史館共五十人開後

彭孫適

彭孫適字駿孫號羨門海鹽人順治甲午舉人已亥

二甲進士由中書分校順天鄉試己未 名試博學
鴻詞一等第一名授編修官至吏部右侍郎兼充講
官辛未 上以講論明賜特命進講大學樂只君子
一節音節宏亮極加稱賞明史久纂未成特命爲總
裁賜專勅異數也年七十致仕歸卒著有松桂堂集
堂名 御所賜也適工詩與新城王士禎名埒時號
彭王嘗步蕭寺僧方製長明燈請爲賦公諾之僧退
煮茗以餉茗未熟而賦成敏捷如此見海鹽續圖經
尤工詩餘士禎倚聲推爲近今詞人第一見感舊集
居易錄云羨門以下丑假歸已卯率子姪登秦駐山

賦詩云平生幾兩中郎屣更不登臨奈老何明年庚辰重九後遂下世殆詩識也

倪燦

倪燦字闇公上元籍錢塘人康熙丁巳順天舉人已未名試一等第二名授檢討有九日平山堂詩云郊壘存危堞寒花映遠瀆鄧漢儀稱其用意能深

張烈

張烈字武承大興人康熙九年庚戌進士授中書已未名試一等第三名授編修晉贊善卒年六十四烈少聰穎讀書數行俱下長專心理學篤守朱子毅然

以閑邪衛道爲已任著有四書講義讀易日鈔四庫全書總目稱集中朱陸異同論不及賈董異同論爲持平王學質疑則未免銀鍊云

汪霽

汪霽字朝采號東川平湖籍錢塘人康熙丙辰進士授行人已未名試一等第四名授編修沈德潛云霽詩英爽嘗作大梁東友起句云星文三尺劍霜刃十年痕自是無知己非關不報恩杰作也

喬萊

喬萊字子靜號石林寶應人康熙六年丁未進士授

中書壬子充順天分校乙未名試一等第五名授編
修時鴻博諸公奉命纂修明史萊體肥窘于步趨
騎羸一頭晨入申出念崇禎朝乏實錄先撰長編以
資討論衆疑之晉侍讀本朝漕運沿明舊制自淮
入河以達會通河既失故道從安東入海嗣又由於
淮泗泛濫由洪澤以南諸河下注治河使者又開減
水填洩之淮楊七州縣蕩析離居穡事俱廢天子
覽臺臣奏濬海口以瀉積水遣使者相視還報可乃
出帑金命安徽按察使于公成龍董其役總督河務
都御史靳公輔上言海口高于雲梯關五尺疏海口

引潮內侵大不便因請築堤束水使高置二牖于邵
伯鎮南高郵州城外自州城築堤二歷興化白駒場
至海口東所洩之水入海計銀二百七十八萬有奇
請先給帑而徐取賞于田畝子粒綱鹽又請設官二
百七十餘員擇才能者任之適萊入視直上御乾
清宮西煖閣閣臣奏事畢問萊濬海口事宜萊直
前奏河臣非是上悅曰此爾一人意見耶萊對淮
揚人所見皆與臣同翼日合戶科給事中劉國黻等
十人持議河臣之言有四不可行海口原有故道第
令塞者通之淺者濬之俾停蓄之水悉趨于海斯已

耳河臣議開大河築長堤堤在內地者高丈六尺河寬百五十丈近海者堤高一丈河寬百八十丈勢必壞隴畝村落墟墓慘有不忍言者不可行一河臣之議先築圍埂用水車踏去埂內之水取土築堤不知臣鄉地卑原無乾土況積潦已久一旦取土積水中投諸深淵工安得成成亦易壞不可行二河臣欲以丈六之堤束水一丈是堤高于民間廬舍多矣伏秋風雨驟至勢必潰潰而南則郃伯以南皆爲魚鼈潰而北則高郵以北靡有孑遺即當未潰之時潴水于屋廬之上豈有安枕而卧者乎不可行三至于七州

縣之田向没于水今束河使寬田中之水豈能倒流入河不能入于河即不能歸于海淹沒之田何日復出不可行四 上是萊言河臣之意乃寢萊之建議也于公頗德之及出領河務值萊歸恒以地方利弊諮萊萊必直言無隱然終不干以私嘗曰予于同籍師事者二人一堯峯一西河或戲曰愚山迦陵不足師乎曰愚意云爾河議初出大學士梁公清標時爲戶部尙書歎曰江淮之間可謂有人有喬氏易俟十八卷石林集若干卷萊卒時年五十三

王項齡

王項齡字顛士號瑁湖華亭人康熙丙辰二甲第八名進士授太常寺博士己未召試博學鴻詞一等第六名改編修累官至工部尚書康熙戊戌重九日命下拜大學士先是松江濱海一日兩潮歷久不易忽于是日三潮人皆詫異

李因篤

李因篤字天生一字子德富平人因篤從吳中顧寧人講韻學最有名寧人作音學五書特載與因篤一札蓋頗重之學者稱關西夫子爲高陽相國所薦相國以年長每兄事之未試前嘗與毛奇齡在相國前

辨古韻不合卽啗喝欲加拳勇南人皆云關中習氣使然康熙己未召試博學鴻詞一等第七名授檢討以母年上疏辭歸

秦松齡

秦松齡字留仙號對巖無錫人順治乙未進士改庶吉士授檢討賦白鶴詩應制有句云高鳴常向月華舞不迎人上頤左右曰此是有品者後罷歸家有園在惠山之麓與漁洋爲同年友善常緘詩一篇題曰寄阮集康熙己未以博學鴻詞徵召試一等第八名授檢討遷諭德辛酉克日講起居注著有毛詩

日箋六卷蒼峴集五卷

周清原

周清原字雅集號蓉湖武進人幼時誤食鐵針着腸
胃間時作隱痛忽夢人名至一處長松夾道朱門徑
丈大字榜云九天元女之府周人拜見元女霞帔珠
冠南面坐以手平扶之曰無他相屬因小女有小影
求先生題詩命侍者出一卷子漢魏名人筆墨俱在
焉淮南王劉安隸書最工曹子建以下稍近鍾王風
格周素敏捷疾書五律四章元女喜命女出拜年甫
及笄神光照耀周不敢仰視女曰周先生富貴中人

何以身帶暗疾我無以報願爲君除此疾作潤筆之
費解翠裙帶授藥一丸命吞之疾自此霍然醒後詩
不能全記尙記一聯云冰雪消無暑辰星繫滿頭子
語周以監生赴京時所夢于忠肅公祠夢忠肅盛衣
冠降階款迎揖就坐莊容相對默默無語有童子立
戶側朗吟一片冰心在玉衡者三竊訝之不敢問頃
辭出忠肅送及階握手言曰余事在爾爾事在余其
謹識之覺後不解所謂及入都謁侍講董公訥公一
見如素館于家先是董公夢忠肅投刺拜訪意若有
所囑未及諮而寤凌晨閤人報周至故異而優禮之

康熙己未開博學鴻詞科遂薦于朝賦題乃璿璣玉衡也乃悟前夢文思沛然有若夙構遂取一等第九名授檢討纂修明史適周分得于忠肅傳同官有以易儲事議之者周立辨其誣論始定初周赴試後有山人平韓卿者精于數董公使爲周占之當得祭酒董云太尊曰否則助教又云太卑及命下謝恩章服未具則朝服假之平原張良哉官助教者始信平言有驗也秋燈叢話已卯典試山東臨揭曉考卷尙不愜意隱几假寐見一猴跳躍而前以劍擊之入籍而沒大叫驚醒同事問之遂詳以告乃自解曰猴者猿也

元同聲劍爲金刀明日爲辰今日爲卯母乃姓劉者中元乎啟箱果于落卷中檢得劉琰卷大佳遂定爲元時山東省共頌知人屢遷至工部侍郎督學福建妻吳氏內家官侍御其聯襟爲進士中書周每至侍御宅皆從左右門自爲出入獨中書至則開中門迎送今周督學過毘陵侍御乃郊迓至宅周步行往謁仍從側門入侍御固請不從乃偕中書皆隨從側門入其不以貴自驕如此在園雜志四十六年 聖祖南巡布衣龔士炯獻歷代年表一書所載至隋而止上乃詔工部侍郎周清原重修未藏事而清原卒復

詔內閣學士王之樞踵修而清原子嘉禎佐之乃相續成編上起帝堯甲辰下迄元順帝至正二十八年戊申凡千七百二十五年名 御定歷代紀事年表共一百卷

徐嘉炎

徐嘉炎字勝力號華隱秀水人監生十二年三月初一日名試一等第十名二十日榜發後二日益都馮相國復修禊於萬柳堂名者十六人酒半相國問包咸註浴乎沂是被濯抑是澡洗宣城施愚山云沂水之上則非澡洗矣時嘉炎熱春秋傳謂古無裸體入

水者惟齊懿被弑時有丙歎閹職入申池浴池與沂川不同且是賤者之事非士大夫所宜行又時屬夏月非暮春也暮春入水恐無是理矣衆以爲然閱日授檢討纂修明史在館中著作多不與人同康熙辛酉 王師叔滇黔羣臣獻頌甚夥惟嘉炎獨倣銑歌鼓吹曲自聖人出至文德舞止凡二十四章每章因事立名與繆襲韋昭何承天輩相表裏又乙丑元夕上於南海子大放燈火使臣民縱觀詔進百戲都盧尋棹拍張殼觶畢陳於前時羣臣從觀者皆有詩歌獨嘉炎作記名紅門花火記備載詳悉屢管至丙

澆書錄
閣學士兼禮部侍郎有抱經集二十卷

陸萊

陸萊字義山原名世枋雅坪其別號也平湖人幼性孝友年十四值江南初下王師之分徇者畧平湖而萊父未庵爲鑲黃旗帶子阿什兔所俘夾斂於項間萊哭泣抱持不聽行乃舍未庵而俘萊至京誠順伯者阿什兔主人也馬姓爲固山見萊異之試以文大喜命拜爲子而使其諸子爲兄弟時永平舉人李茂春授生徒於遷安之龍起寺萊與馬氏往受學值歲試萊偶應之自遷安至永平縣府二試皆第一

馬氏慮其名著急沮院試不合赴留于旗四年適兄世楷以開科選貢廷試于天安門外除平陽府通判尋公于李舉人家會之他寺而父未庵又以丙戌中試赴公車乃親詣誠順伯里第乞放萊歸許之以世枋名補平湖諸生以浙鄉試不利因改今名援例入國學高等授內宏文院辦事中書舍人遂舉順天鄉試康熙六年進士第二人爲原官康熙十七年開制科御試一等第十一名萊以官典籍收授翰林院編修八年以明史久未成謂史官規避被劾就道是年庚午舉鄉試即命爲福建正主考官凡薦卷

皆親閱無一遺者越一年轉左右春坊贊善復以癸酉舉鄉試命爲順天鄉試副主考新合翰詹諸官傑直南書房承旨書二扇宣至 乾清宮閣內賜坐出五臺金蓮花命賦限以韻立賦呈 上嘆賞不置退就南書房出御製金蓮花詩 賜讀之康熙三十三年特開豐澤園試翰詹諸官八十九人先設宴於勤政殿宴畢就園試豐澤園賦理學真偽論停午賜酒莫晚賜茶餅及 上親閱卷取第一且面諭云連次詩文並無出汝右者而從前薦引並未之及始知上聞固多壅也遂由宮贊陞內閣學士兼禮部侍郎越

數日復宜至乾清宮撰闕里孔子廟碑 賜鮮荔校御筆所臨米芾綾字一幅于懋勤殿嗣此入閣嘗于 一日獨坐判紅本七十有奇每啟事賜春苑撤膳賜 間以病休沐 上輒問云陸棻何在耶恩寵如此

馮勗

馮勗字方寅一字勉曾長洲人父六皆客閩中後耿精忠亂閩父客死康熙己未勗以布衣名試一等十 二名授檢討纂修明史即請假歸入閩尋父櫬時亂甫平遺櫬縱橫未得其處勗伏地慟哭忽有老人告曰牆西有半寸釘者是諦視題識宛然遂扶以歸

志 戊辰後宮嘗與朱彝尊宴集朱有秋日集馮檢討
齋分韻得南字後朱謫官場有招諸同年集六韜園
對菊分韻賦詩朱有可怪南隣馮檢討酒錢肯爲謫
官慳之句載曝書亭集晚告歸自號葑東逸史

錢中諧

錢中諧字宮聲順天昌平籍吳縣人順治戊戌三甲
第三名進士及第康熙己未博學鴻詞一等第十三
名授編修學問淹貫爲諸生時請減蘇松浮賦條議
三吳水利皆切於寔行居家孝友年八十無疾而終
所著有篋裯集湖菑編

汪楫

汪楫字舟次江都人以貢署贛榆訓導會 上特開
博學鴻詞蘇撫慕天顏以楫名應 上拔置一等十
四名授翰林院檢討二十一年春琉球國王請封爵
舊典用給事中行人各一員往 上重其選 特命
廷臣會推可使者以問入 朝人多俛首畏縮楫鶴
立班中大臣遂以楫對充正使 賜一品服臨國王
之讌楫也酒半手自彈琴以悅楫楫故善音樂與譚
長清短側之辨王大悅服及請楫書殿榜楫縱筆爲
擘窠書王大驚以爲神出知河南府福建按察使轉

布政以疾告 上南巡猶強起迎于宿遷望 駕至揚州衣朝衣伏道左 天子執視曰汝老邪朕幾不識卿矣 宣賜御書未幾卒年六十有四所著有悔齋集

袁佑

袁佑字杜少號霽軒直隸東明人少警敏下筆數千言立就以拔貢授中書已未詔舉博學鴻詞詹事沈文恪公以其名 上御試一等十五名授編修時同館多告假佑慨然曰居是官當勤是職頭白可期汗青無日非曠官乎爰搜有明諸遺書點竄不停手所

作本紀列傳若干卷考訂精詳有廬陵筆意歸里後舍西有小園奉母其間母疾革額天願減算益母壽母果無恙人謂其孝感家居七年母九十二乃卒佑哀號無虛日不茹腥飲酒體素豐厚至是羸瘦及服除遂不復噉肉復官晉右中丞浙江鄉試正考官浙人服其公撤闈郎倣裝惟圖書數篋及所著紀行詩一卷而已年六十卒有詩禮疑意左史後議老子別註離騷荀揚文中子補註莊子註論杜詩註駁數十卷所著詩文有五鹿詩選二卷圖說五卷史餘集五卷補史集四卷予省集五卷聲聞偶記一卷圖說五卷

袁氏族譜一卷

朱彝尊

朱彝尊字錫鬯號竹垞秀水人明武英殿大學士文恪國祚曾孫學生茂曙長子生而聰慧絕人數歲讀書過目不忘塾師舉王瓜使屬對應聲曰后稷師怒答之爲舉業文千言立就已能工詩年十七贅婚嘉興練浦之馮公有客王廷宰紫華亭名士也酒間舉古人名俾作對如鄭虎臣對沈麟士蔡興宗對崔慰祖古中孚對溫大有杜審言對蕭恩詔韓擇木對李綱筠蔡有鄰對徐無黨鄭櫻桃對郭芍藥之類大奇

之曰此必以詩名已未開制科以總督倉場戶部侍郎嚴沆吏科給事中李宗孔薦召試博學鴻詞一等十六名授檢討纂修明史分撰嘉靖諸臣及文苑傳有上總裁七書最爲詳悉而第一曰彝尊來自田間學無師法一旦入著作之庭備員纂史受命以來憍憍惴惴伏念史尚三長而不有其一何以克副厥任猶幸有閣下總率之可以無恐今開局逾月矣顧未見體例頒示竊有所陳造門者再未值歸沐之暇敢奏記于左右歷代之史時事不齊體例因之有異班固書無世家而有后戚傳已不同于司馬氏矣范

蔚宗書無表志後人因取司馬彪續漢書志以爲志
又不同於班氏矣蓋體例本乎時宜不相沿襲故漢
之光武唐之孝明宋之真宗皆嘗行封禪之禮作史
者不必效史而述封禪之書也德星慶雲醴泉甘露
器車龍馬嘉禾瑞麥一角之獸連理之木九莖之芝
不絕於世作史者不必效北魏南齊而述符瑞之志
也此志之不相沿襲也班史第古今人表上及於皇
初歐陽子紀宰相世系下逮於子姓之游幸金之
交聘他史無同焉者此表之不相沿襲也史記列傳
有滑稽日者五代有家人義是俗官宋有道學他史

無之此傳之不沿襲也至若皇后一也尊之則附
於帝紀之則冠於臣傳公主一也或爲之傳或爲之
表釋老一也或爲之志或爲之傳餘如天文五行或
分爲二職官氏族或合爲一然則史蓋因時而變其
例矣明三百年事有創見者建文之遜國革除長陵
之靖難裕陵之奪門宜何以書躋興獻王於廟存之
則爲無統去之則沒其寔宜何以書志河渠者前史
第載通塞利害而已明則必兼漕運言之而又有江
防海防禦倭之術宜何以書志刑法者前史第陳律
令格式而已明則必兼厰衛詔獄廷杖肱之宜何以

書若夫志地里則安南之郡縣朶顏之三衛曾入圖
版旋復棄之又藩封之建置衛所之參差宜何以書
至於土司之承襲順者有勤王之舉反側者興征討
之師入之地志則不能詳其事入之官制則不能著
其人宜何以書凡此皆體例之當先定者也又魏定
黔成英臨淮諸國衍聖一公咸與明相終始則世家
不可不立惟是張道陵之後覲顏受世祿奉朝請於
義何居然竟置不錄難乎免於闕漏宜何以書此亦
體例之宜審量者也蓋作史者必先定其例發其凡
而後一代之事可無紕繆彝尊不敏鹿舉大綱伏希

閣下不遺葑菲之末而垂采焉示之體例俾秉筆者
有典式譬諸大匠作室必先誨以規矩然後引運
斤經營揆度崇庠修廣始可無失尺寸也矣惟閣下
垂察幸甚幸甚又言伏承閣下委撰明文皇帝紀彝
尊本之寔錄參之野紀削繁證謬屏誣善之辭擬藁
三卷業上之史館矣昨睹同館所纂建文帝紀具書
燕王來朝一事合之鄙藁書法相違彝尊愚暗匪敢
露才揚己暴人之短惟是史當取信百世詎可以無
違有故敢述其所聞復上書於閣下明太祖之崩在
洪武三十一年五月遺詔諸王各於本國哭臨不必

赴京踰月而訃至燕燕王抵淮安勅令歸國斯太祖
是錄史臣曲筆謂用事者矯詔却還當在是年之秋
也時方執周王橐廢爲庶人是東齊王博有罪名入
京留之燕王方慮禍及歸國恐後因簡壯士爲護衛
追齊王之入燕且益懼焉肯以次年來朝身犯危地
而且傲慢無禮由皇道入登陞不拜致監察御史曾
鳳韶戶部侍郎卓敬一劾王大不敬一請徙封南昌
建文帝不報而燕世子及弟高煦適以三月至京師
譬諸虎離其穴盡將虎子深入坎窞陷穽之中縛之
一二獵夫力爾雖至愚者勿爲而謂智慮過人之燕王

爲之乎且燕世子之來在三月則是時燕王猶未反
國野史稱文皇遣之來誰實遣之姜清祕史據南京
錦衣衛百戶潘瓊貼黃冊內載校尉潘安二十三日
欽撥隨侍燕王還北平以爲來朝之驗似若可徵然
稽之寔錄靖難師駐龍潭帝願望鍾山愴然下淚諸
將請曰禍難垂定何以悲爲帝曰吾異口渡江卽入
京見吾親此爲姦惡所禍不渡此江數年今至此吾
親安在瞻仰孝陵是以悲耳然則太祖崩後燕王未
嘗入朝可知已蓋革除年事多不足信卽燕王來朝
不足信者一也金川門之變寔錄稱建文帝闔宮自

焚中使出其屍于火越七日備禮葬之遣官致祭輟
朝三日野記則云松陽王景請以天子之禮葬文皇
從之夫既葬以天子之禮未有不爲之置陵守冢者
而鍾山左右無之則備禮云者亦史臣欺人耳目焉
耳况孝陵淘葬文皇責建文以廢人之禮葬其祖又
豈肯以天子禮葬建文乎不足信二也北京金山口
景陵之北相傳有天下大師之塔謂是建文皇帝墳
此尤無據葵尊嘗登房山山隅有亂塔寺瘞僧骨不
可數計繞山村落田中亦多僧塔或題司空或題司
徒或題帝師國師蓋遼金元舊制則然所稱天下大

師不足爲異而乃誣爲建文帝墓旣云不封不
其誰復立石爲表不足信三也從亡隨筆稱太祖預
貯紅篋於奉先殿側四圍以鐵錮之鎖二亦灌以鐵
汁程濟破之得三渡牒濟爲帝祝髮旣扶帝出聚寶
門矣不應復折而至神樂觀不足信四也致身錄帝
至鬼門從者八人牛景先用鐵棒啟之而出考是日
乙丑文皇帝一入金川門卽命分諸將守京城及皇
城鬼門非無人之境爲景先者持鐵棒啟門守城將
士豈無一人見者不足信五也建文帝方先生孝儒
衰杖哭闕下語文皇曰成王安在此事之所有也至

文皇謂曰獨不顧九族耶荅曰便十族如何因并其弟子友朋爲一族戮之此則三家村夫子之說矣歐陽夏侯尙書雖云九族者父族四母族三妻族二而馬鄭俱云九族上自高祖下至元孫九峯蔡氏從之故世之言九族者名爲九其寔本宗一族耳迨秦漢誅及三族爲最酷而造爲是說使文皇果用是刑無舍母妻之族而遽誅及于弟子友朋者且正學之友最莫逆者無如宋仲珩王孟縕仲縉鄭叔度林公輔諸人故叔度之弟叔羨叔端仲縉之子叔豐皆爲及門高弟諸君惟仲縉先卒其餘當日咸不及於難緝

其遺文以傳足以破野史之謬不足信六也寔錄文皇旣入卽叔孝孺旋執太子澄至闕同磔於市所榜姦黨二十五人鄭賜黃福尹昌隆在其列不聞伏法又靖難師起北平所司州縣官棄職遠避朱寧等二百一十九人亦未嘗悉誅獨大理少卿胡閏野史謂抄提男女二百一十七人俱死外遣戍者又一百一十四人而奉天刑賞錄載茅大芳妻死上命飼狗不應若是之酷不足信七也萬歷初以建文帝所遺三詩宣付史館竊疑是黥竄元之故臣憶庚申君之作若天命潛移四海心一語豈出之帝口乎不足信八

也鐵鉉二女没人教坊世傳七言二詩乃吳人范寬
題老妓卷而作載皇明珠玉集中好事者巧爲付會
不足信九也河西傭川中補鑄匠雪菴僧東湖樵夫
潔其身隱其名姓據傳以書奚而不可乃憑轉輪殿
鼠嚙餘冊一一寔之不足信十也文皇寔錄載壬午
歲七月命前工部尙書嚴震直戶部尙書王鈍應天
府尹薛正言分往山西山東陝西巡視俾奏利弊震
直受詔至山西九月卒於澤州公廨初不聞震直督
餉山東爲北兵縛置布囊夾以兩馬昇至京後使安
南回滇遇吞金之事不足信十一也至若因楊行詳

事而移之楊應熊王元美辨之矣不足信十二也因
史仲彬之名而造爲致身錄久而附益之錢受之駁
之矣不足信十三也世之論以革除靖難之事載諸
寔錄者皆曲筆無寧取之野史然寔錄之失慮在是
非之不公然人物可稽歲月無舛後人不難論定至
遜國諸書往往以黎丘之鬼眩人觀聽以虛爲實以
僞亂真其不滋惑焉者寡矣閣下宜辨去其惑曉然
開論同館母相矛盾作史之貴乎有識者此也故因
燕王來朝一事而兼及之惟閣下澄鑒不宜充起居
注日講官康熙二十年辛酉七月典江南鄉試得方

苞胡任輿陸肯堂黃夢麟人其服其公明壬戌春復命入都刑部尙書魏象樞衣朝衣造之再拜曰吾非拜君也慶朝使之得人也甲子元日侍宴上念講官家人特賜肴果二席馮孺人九拜受之異數也是月因輯瀛洲道古錄一書以楷書手自隨錄四方經進書忌者譖訴學士牛鈕劾之吏議落職奉旨降一級三月徙居宣武門外海波寺街古藤書屋二十九年補原官壬申復罷官挈眷旋里丙子結曝書亭于荷花池南有菱池芋陂同心蘭砌青桂巖槐泝繡鴨灘落帆步諸景四十四年 聖祖南巡朝見行殿

進經義考易書二種 上諭此書甚好留南書房特賜研經博學四字扁額四十八年己丑卒年八十一時十月十三日方開雕曝書亭集謂次孫稱孫曰吾不能久待奈何建文寔錄紕繆附會病少差當續成之無使後人滋惑也先是竹垞性嗜鴨少時夢行郊外見大池內蓄鴨數千頭有童子守其旁問之曰此公一生食料也嗣年八十一偶抱恙後夢其處池內存鴨二後戒家人無進鴨適女歸寧烹二鴨獻歎曰予食祿其盡於此乎是夕卒葬百花莊文淵閣大學士陳廷敬爲作誌銘有曝書亭集八十卷經義考三百

卷日下舊聞四十二卷外有明詩綜詞綜五代史注
麟志若干卷子昆田先十年卒有漁笛小藁十卷夔
尊好飲酒嘗與高念祖入都每日暮泊舟輒失所在
往求之則已闌入酒肆中醉卧鑪下矣又好校書絳
雲未燼之先藏書至三千九百餘部而錢遵王敏求
記凡六百有一種皆紀宋板元板及書之次第完闕
古今不同手披目覽類而載之遵王畢生之菁華萃
於斯書既成扇之枕中出入每自攜靈踪微露夔尊
謀之甚力終不可見後典試江左尊王會於白下夔
尊故令客置酒高譙約遵王與偕私以黃金青鼠裘

予侍書小史啟鑰預置楷書生數十于密室半宵寫
成而仍返之當時所錄草窻絕妙好詞在焉詞既刻
函致遵王漸知朱詭得夔尊爲之設誓而謝之何焯
求記或云從錢氏族壻因得假歸云竹垞在京與人
夜飲各舉古人男女成對者爲酒令得太白小青無
咎莫愁漂母灌夫武子文君東野西施等字嘗舉四
書一則恰合平上去入得康子饋藥兵刃既接二語
又在郵除夕集唐作聯云且將醅酌酬佳節未有涓
埃答聖朝又罷官後集聯云聖朝無棄物餘事作詩
人又爲人題隱居云天下何曾有山水老夫不出長

蓬蒿又題人水船云不作風波于世上別有天地非
人間查浦輯開四庫全書總目云蔡尊初入翰林時嘗編
其行藁爲竹垞文類王士禛爲作序亟稱其永嘉詩
中南亭西射諸篇然其時僅規撫王孟未見所長至
中歲以還學問愈博風骨愈壯長篇險韻出奇無窮
趙執信談龍錄以蔡尊士禛爲國朝兩大家謂王之
才高而學足以副之朱之學博而才足以運之及論
其失則曰朱貪多王愛好亦公論也

陳維崧

陳維崧字其年一字迦陵宜興人年十七爲諸生至

四十餘尙偃蹇場屋有日者謂之曰君過五十必入
翰林梅杓司贈句云朝來日者橋邊過爲說功名似
馬周至己未果以博學鴻詞薦 名試一十七名授
檢討時年五十四又四年卒未疾時屢以江湖山藪
爲念緣史方殷未敢引退疾亟吟斷句云野鳥山花
是故人猶振手作推敲勢云維崧少清灑長而于思
人皆稱爲陳髻旣連不得志于有司乃到處逢迎自
王公卿以下凡賀贈餞頌必得其片紙以爲榮脰脯
溢于堂棊屢錯于戶頽視金帛如土贈遺千金隨手
散去遇匱乏則仰屋擁書眠如是者終不悔爲人多

不擇細行嘗遊如臯臯巢民愛其才延致梅花別墅
臯有童名紫雲者優麗善歌合其執役書堂維崧一
見神移適墜梅甚開偕紫雲徘徊于暗香疎影間巢
民偶登內閣遙見之忽佯怒呼二健僕縛紫雲去將
加以杖維崧營謀無策意極徬徨計惟得臯母片言
方解此厄時薄暮乃趨赴母宅前長跪門者曰陳先
生有急必求太夫人發一玉音非蒙許諾不起也因
備言紫雲事頃之青衣媪出曰先生休矣巢民遵奉
母命已不罪雲即然必得先生咏梅絕句百首成于
今夕仍送雲即侍左右也維崧大喜攝衣而回篝燈

濡墨苦吟達曙百咏既就亟書送巢讀之擊節笑遣
雲郎送之虞初新志尤侗云古之髯者有蘇髯今之髯者
有陳髯皆髯之軼倫超羣也其年詩詞古文甚富已
爲傳人而負才落魄頽然自放嘗客如臯嬖臯辟疆
歌童紫雲相好若夫婦畫其小影攜之出入同人題
詠甚多亦有一絕暗合杜分司韻但李家紫雲是
女郎冑家紫雲乃男子耳其後雲郎颺去髯作惆悵
詞憶之語云男歡不畢輪女歡不燮席豈不信乎然
其年以前魚之癖坐是不得中壽則又所謂美男破
老美女破舌也根齋雜說宋犖云王西樵常語子弟曰陳

其年短而髯不修邊幅吾對之祇覺其樸媚可愛以
伊胷中有數千卷書耳維崧有湖海樓詩集為絲詞
迦陵文集陳檢討四六文集各二十卷又有兩晉南
北集珍六卷

湯斌

湯斌字孔伯號潛菴睢州人自少卓立舉動尺寸不
踰年十二聽里中耆儒王慕祥講小學侍坐終日無
倦容退即見諸行事慕祥奇之順治戊子舉于鄉明
年會試中式越三年壬辰進士改庶吉士鍵戶一室
惟與魏象樞曹本榮以理道相切磋乙未授檢討進

庶子戊午 召舉博學鴻詞大臣交薦 御試一等
第十八名補翰林院侍講先是斌為庶子時夜夢登
高山已陟其半忽一人自後越之湯鼓身至山巔有
室懸麻姑仙壇記既覺不知所謂癸未臘閣學缺出
特用左坊王鴻緒甲子二月閣學復缺斌遂繼擢是
年六月特擢巡撫蓋蔡經壇在撫州而蔡經家在吳
洞庭也事之前定如此吳地素多淫祀楞伽山五通
神尤甚姦巫淫尼競相扇惑士女怵于禍福鼓吹牲
帛饗禱無虛日斌取其象按湖中並他處所建悉毀
之奏請通行永禁民始大駭已而妖絕先是毀上方

沙金
山撤土偶投之水有人于地中得古石碣上刻肉山
酒海遇湯而敗云仙人張三多書也見居易錄二十
五年 詔擢工部尚書掌詹事府事吳人聞其去痛
哭罷市叩轅乞留者日萬計比行老幼提攜奔送自
吳門至江北千里不絕至渡淮乃已初前撫余國柱
在吳聲名狼籍既遷戶部尚書移書江蘇布政使索
庫銀四十萬兩以婚要人斌不許又聞斌深得民心
以為形已之短恨刺骨及斌赴召還朝國柱已居政
府讒害百端又嗾廷臣交章劾之而 上俱置不問
斌已病尋改工部以疾卒官 上問特命學士以桐

酪奠馳驛護喪歸予祭葬吳人聞其卒家家肖像
祀之雍正十二年奉 旨崇祀賢良配享 孔廟

謚文正

年譜神道碑
墓志銘合纂

四庫全書總目云斌在國初與

陸隴其號醇儒隴其之學薦守朱程其攻擊陸王不
遺餘力斌之學源出濬城孫奇逢其根柢在姚江而
能持新安金鑑之平大旨主於刻勵寔行以講求寔
用無王學杳冥放蕩之弊故二人異趣而同歸

汪琬

汪琬字茗文號鈍翁順治乙未成進士除戶部主事
改刑部遷郎中會江南奏銷案起例奪二官謫北城


兵馬司指揮再遷戶部主事康熙十七年 詔舉博
學鴻詞取一等十九名改翰林院編修入史館僅六
十日謬史傳一百七十餘篇遽以疾請年六十自是
及 歿又十年終不復言出甲子冬 駕東巡至蘇
吳門在籍諸臣恭迎河干 上召撫臣湯斌諭曰汪
琬人在翰林院文名甚著近又聞其居鄉不與聞外
事可嘉特賜 御書一軸卒年六十有七琬性弁急
不能容人過意所不可輒面批折人對客議論大聲
頰發赤目光州炯雖詩文小得失不肯稍徇以是人
多嫉之十七年 召試鴻博時薦舉諸人會于衆春

園有以謾詩緘呈汪茗文者衆止見其結句云杯盤
狼藉醉巢由嘉善柯維楨以語陸稼書先生曰文人
輕薄之習有以自取可不畏哉見陸先生年譜

邱象隨

邱象隨字季貞山陽人與兄順治乙未進士侍講象
升齊名號二邱以拔貢生舉博學鴻詞一等第二十
名授檢討官至太子洗馬有西山紀年集王士禛云
故友季貞與張養重游東浙行處州山中各有卽事
詩一云西風黃葉無人徑破廟山神對古松一云百
年無與人間事老死深山古木中今人攘攘入市者

不知世有此境也香祖餐重字瞻亦山陽人別號柳
冠道人餐重游浙東過廣陵時王士禎為司李謁甫
罷士禎即問曰夙愛足下南樓楚雨三更遠春水吳
江一夜增如此好句復有幾張退謂象隨曰不意阮
亭一見便能道出



淡墨錄卷五

綿州 李調元 雨村

李來泰

李來泰字仲章號石臺江西臨川人順治壬辰進士
授工部虞衡司主事出督江南學政已而巡視漕河
裁缺歸里已未 名試博學鴻詞二等第一名授侍
講詩工應制體有詩云紅橋循蟻渡綠樹貫魚歸西
河詩話云凡翰林賜宴瀛臺定在暑節每起早涼入
西苑門大柳星稀高槐露下宮牆綠岸間冒昧徐行
菰蒲四面水禽鳴嘶與江南水鄉無異暨渡版橋則

荷香襲衣輝流滴耳宛在夢中聽等筑聲然後復內苑牆入小紅門豁然大湖有紅版長橋橫跨水面橋夾朱欄欄外維列魚舂凡朝官渡橋者俱許抽舂捉魚得即攜歸于是迤邐達瀛臺門惟賜宴時則詔從牖口北上直西浮道通梁中有層亭兩面帳房如號舍排列上命登舟汎太液池即從過船亭登舟菱荷十里望如蕃錦北面望金色遙齋別別一境地矣一時鴻博諸人皆親歷焉未幾卒于官有蓮龕四十餘卷從前翰林未有之盛典也

潘耒

潘耒字次耕吳江人師事顧炎武故詩文皆有原本康熙十七年己未以博學鴻詞試取五十人上上卷爲一等上卷爲二等及拆卷上問衆大臣曰詩賦韻亦學問中要事何以都不檢點賦韻且不論即詩韻在取中者亦多出入有以冬韻出宮字者此何說也衆荅曰此緣功令久廢詩賦非家絃戶誦所以有此然亦大醇之一疵也今但取其大焉者耳上是之仍取中二等第二名拆卷即耒卷也繡科授檢討纂修明史耒以史事重大條上四條總裁然其說派令撰食貨志兼紀京師有萬柳堂爲益都相國創置在

崇文門外平曠曼衍布以萬柳爲朝士游憩地每歲
逢上巳益都必率門下士修禊其中飲酒賦詩竟日
而散壬戌上巳陪侍者三十二人益都唱二詩其首
章第六句曰水萍風約故沿留似有所寄及閣和詩
每遇是韻輒沉吟良久如徐春坊健菴盡日行吟步
屐留施侍講尙白回溪時有斷雲留陸編修義山落
花香倩蝶鬚留方編修渭仁烟宿寒山翠欲留徐檢
討華隱小雨泥看履邱留高檢討阮懷羽觴汎汎去
還留汪主事蛟門輕陰時爲落花留林中書玉巖檻
拂垂楊科栗留之類後至潘檢討稼堂東山身爲草

堂留益都拍案而起稱爲第一益是年七月益都將
致政故先以留字探意及得是語便犁然有當也後
二年甄別以浮躁降調遂歸四十二年復原官顧炎
武所著日知錄多經世大業未在閩中有贈買山資
者舉以刻之始得傳于世生平所著類音八卷遂初
堂時文集四十卷

沈珩

沈珩字昭子海寧人康熙甲辰會試第一人殿試二
甲第一名進士授中書舍人已未名試博學鴻詞二
等第三名改授編修癸亥告假家居就醫秀水之鴛

湖時嘉興同知孫曰恕以督修海邊艤腫訪珩于僧
寺珩引唐世轉運船塢之利病見于肩山之論者以
爲說孫大稱善後樓船橫海師起平虜如掃落葉賴
孫所部檣櫓之助居多用珩言也見珩司馬孫公與
頌序水率所著有耿巖文選

施閏章

施閏章字尙白號愚山又號夔齋宣城人順治三年
鄉試十八名六年己丑會試中式觀政刑部湖廣司
主事員外郎丙申秋奉使視學山東其應考差也名
在第一大學士安邱劉公實薦之後屬其同年孤子

後書以不入格被黜落劉公語山東巡撫曰學臣不
受請託獨施君耳嘗有名士入場作寶藏興焉悞記
爲水一節錄畢始悟料無不黜之理作詞于文後曰
寶藏在山間誤認卻在水邊山頭蓋起水晶殿湖長
峰尖珠結樹顛這一回崖中直跌撐船漢告蒼天留
點蒂兒好與友朋看愚山閱文至此和之曰寶藏將
山跨忽然問在水涯樵夫漫說漁翁話題目雖差文
字却佳怎肯放在他人下常見得登高怕險那曾見
會水渰殺愚山又審聊城下牛醫女胭脂一案審出
真犯毛大釋已革生宿介將胭脂配與生員鄂秋隼

有判語四六爲人傳誦事載聊齋志異獎進後學皆
此類也自山左數年來詩文刻爲觀海集辛丑分守
湖西地辛亥夏奉部入都補官以叔父年老辭歸在
都與宋荔裳琬曹顧菴爾堪沈繹堂荃王西樵士祿
程滄榛可則王阮亭士禎陳說爨廷敬詩歌倡和吳
孟舉有八家詩刻戊午 名試博學鴻詞年六十一
歲擬一等 上以省耕詩旗字誤書旂字特降置次
等授侍講轉侍讀正月奉旨纂修 太宗文皇帝
寶訓愈不敢自逸三月望日力疾趨朝歸猶構成馮
文定公傳自辰至酉坐風簷下膺寒疾遷延數月病

中得句云欲報 主恩心未死又有憶卜葬處口占
一首蓋絕筆也所著有雙溪堂學餘集八十卷年譜
四卷詩話雜著二卷

米漢雯

米漢雯字紫來安化人一云宛平人明太僕少卿萬
鍾之孫工詩兼善小令書畫承其家法時呼爲小米
家蓄古硯乃太僕知六合縣時所獲甚寶惜曾渡江
沉水募善泗下水不得將解纜忽有紅霞起水面其
光燭天命舟人索之硯隨手出焉順治十八年辛丑
進士授長葛令到任清靜無事民皆安之漢雯本善

度曲時有剃頭待詔羅漢者衛輝人貌寢甚一日方剃髮家童有吹笛者羅漢忽曰誤矣命作一弄甚妙又合吹笛曰必和胡琴乃可明日自製胡琴吹之果異凡調雖吳中曲師不能過也漢雯由是究極音樂常與談論康熙十二年癸丑會試題傳至長葛其孟子題爲盡其心者一節漢雯嘆其難羅漢爲闡發傳註名理燦然又曰此章與宗門某公案相發明因引諸尊宿語錄如翻水漢雯益竒之叩其所學頗記唐人詩數百篇兼曉篆隸一日忽辭去自言有母在河北當來一別即往五臺不歸矣後竟不來亦竒人也

調建昌令政聲如前縣署有水夫文三郎頗文雅不類俗人常令隨侍漢雯後謝事居南昌三郎亦隨之漢雯一日見家人握兩素扇一畫梅一畫蘭竹又書唐人絕句二首問之郎文三郎妻徐蓉所作也年才二十二觀池北因拭目待之是時漢雯已行取主事十七年薦舉博學鴻詞十八年召試二等第五名授編修癸亥科漢雯偕戶部主事高瑄主雲南鄉試陞中允未幾卒著有始存詞

黃與堅

黃與堅字庭表號忍菴太倉人三歲能識字五歲能

誦詩酷好唐人詩律錄小本攜出入十四歲即有志
于古欲遍讀周秦以下書百家諸子至六朝以上幾
盡論世順治十六年己亥登二甲三十九名進士以
知縣用康熙十八年己未名試博學鴻詞二等第六
名授編修陞贊善告病歸家任團溪同館朱彝尊爲
詩贈云團溪水遠舍北流團溪花發牆東頭先生歸
去著書便日坐團溪溪上樓後卒著有忍菴集

李鎧

李鎧字公凱號惺菴山陽人順治十八年辛丑第三
甲一百四十九名進士授盛京蓋平縣令康熙十八

年己未名試博學鴻詞二等第七名授編修陞甲允
進諭德鎧嘗有自查山至松山入蓋平諸詩鄧孝威
選人詩觀最多謂非公凱不能言之洞曉而愷切蓋
爲吏難爲陪京之吏更難也

徐鉞

徐鉞字電發號虹亭吳江人幼穎敏年十三賦詩有
驚人之句又善畫山水己未名試二等第八名授檢
討與朱彝尊同寓虎坊橋會有翰林外轉事鉞以忤
權貴意亦在遣中遂拂衣歸晚號楓江漁父年七十
三卒所刻菊莊詞朝鮮貢使仇元吉見之以金餅購

去貽詩曰中朝攜得菊莊詞讀罷烟霞照海湄北宋
風流何處是一聲鐵笛起相思其為遠人所慕如此
所著有南州草堂集三十卷詞苑叢談十二卷本事
詩十二卷

沈筠

沈筠字開平仁和人康熙戊午以博學鴻詞薦是年
登順天榜明年成進士庶吉士名試二等第九名授
編修閱三年癸亥卒筠行醇學博不究其用論者惜
之

周慶曾

周慶曾字燕孫常熟人順治十五年戊戌中式十八
年辛丑進士候補主事己未 名試博學鴻詞二等
第十名授編修纂修明史甲子充浙江鄉試正主考
病篤不入闈遂卒

尤侗

尤侗字同人一字展成長洲人號悔菴十五應童子
試太守史應選奇其文曰此子必以文名世戊子拔
貢歷試不利謁選除永平府推官坐撻旗丁邢可仕
鐫級歸卒不出己未康熙十七年始以王熙陳鼓永
薦博學鴻詞 名試二等十一名授檢討纂修明史

上閱卷時相國馮溥奏侗臨去秋波樂府事 上大
笑久之十九年庚申蜀平侗上平蜀頌 上指侗名
謂葉庫二學士曰此老名士也聞者榮之 上御瀛
臺名諸臣從舟賜宴兼頒綵幣宴畢仍賜藕攜歸時
七月二十一也居三年長子珍登進士選庶吉士二
十二年賜慶成宴侗父子與宴二十三年年六十六
以老告歸家居亦園水哉軒揖青亭有亦園十景詩
卒年八十七所著西堂雜俎艮齋雜記及文集餘集
共百餘卷珍字慧珠一字謹庸康熙壬戌進士入翰
林遷右贊善念親老乞養歸遂不復出年八十七卒

侗年八十二猶康強善飯相地于官山築生壙自爲
之志結西舍曰草草山房朱彝尊爲八分書

范必英

范必英字秀寔號伏菴初名雲威字秋濤長洲人參
議允臨子順治甲午拔貢丁酉順天舉人康熙己未
名試博學鴻詞二等第十二名授檢討纂修明史
分纂事畢即謝病歸不出自號野野翁又稱杜圻山
人居鄉廉靜罕至公府所居芝蘭室三楹家有萬卷
樓藏書二十四櫃皆手自訂正日誦讀其間凡禮樂
刑政兵農水利之書以及文章家源流高下歷歷能

指數所為詩古文詞綺麗雅馴晚喜汲引後進從遊者二百餘人講解不倦年六十二卒有諸將詩云無諸臺上英風起千載重來顧盼雄父子河山兼雨越弟兄花燭盛中宮鵬旗鐵陣參雲黑龍馬珠江浴日紅回首伏波銅柱遠軍威更在挹樓東為耿精未謀逆以前作也沈德潛謂耿氏寵榮至此而逞應吳逆以為聲援其不旋踵而撲滅也宜哉觀必英詩可鑒矣

崔如岳

崔如岳字岱齋以字行號青峙直隸獲鹿人康熙乙

卯舉人已未名試博學鴻詞二等十三名授檢討在維揚時所著有坐嘯軒瑣言鄧孝威云青峙詩古風則蒼堅英拔近體十麗則之中饒有逸宕之致絕句居然龍標嘉州矣

張鴻烈

張鴻烈字毅文江南山陽人廩監生康熙己未名試博學鴻詞二等第十四名授檢討二十三年十月黃河漲發淮水倒灌淮南山陽鹽城高郵寶應興化泰州江都七邑受害御史李時謙奏請疏浚淮揚下河七邑之民適值 聖祖南巡相度形勢發帑救

民遣官督理張鴻烈上疏淮揚水患關係運道民生
淮安以南則山陽鹽城高郵寶應興化泰州江都七
邑受害淮安以北則清河桃源宿遷邳州睢寧沐陽
安東海州八邑受害 皇上準臺臣李時謙條議疏
浚淮揚下河以救七邑之民適值 聖駕省方親過
淮揚洞察情形特遣大臣踏勘後復經會議遂發帑
金速往經理大哉 帝德如天好生七邑之黎何幸
至此但臺臣只知淮安以南七邑之害而不知淮安
以北八邑之害其苦一也只知七邑之民田昔受決
口之水今受滾壩之水而不知八邑之民田在黃河

岍以內者其苦尤甚也臣世籍淮人何忍不爲八邑
生靈再請命于 聖主之前乎等語命總河確勘查
明具題到日再議奉 旨依議鴻烈短章秀卓其絕
句多從樂府得來其金陵道 上詩云無數杏花烟
裏開遠山帶雨送青來當鑪少婦喚沽酒笑客能傾
幾百杯又有詩云蓮葉灣西蕩畫橈當年曾共聽吹
簫美人已去歌樓換腸斷西冷第一橋皆此類也

方象瑛

方象瑛字渭仁遂安人康熙二十二年癸卯舉人六年丁
未會試改策論中式中式二甲三十六名進士候選

中行評博十八年己未 名試博學鴻詞二等十五
名授編修纂修明史癸亥科象瑛偕吏部文選司員
外郎王材任主四川鄉試乞假歸晚自號金門大隱
遂不出所著有健松齋二十四卷續集十卷又有錦
官集鄧漢儀云壬子王阮亭使蜀著有蜀道集癸亥
方渭仁亦使蜀而作錦官集兩公同屬典試其入蜀
也同遊秦隴及其歸也同自荆巫爲詩之數亦畧相
當顧王在未亂之先方在亂定之後一則多綢繆陰
雨之功一則多哀憫瘡痍之什詩皆高秀古奧罕有
其匹者

李澄中

李澄中字渭清號漁村又號雷田四川成都籍山東
諸城人始生父熹李攀龍入室少與劉子羽稱石交
子羽見薛臣七才圖謂貌似攀龍澄中亦嘗夢人授
一卷文曰此汝作也醒憶之是攀龍華山記中語既
長能詩仍效攀龍體戊午以拔貢生被 名既至京
擁書卧僧舍不肯干恩達官己未 名試博學鴻詞
二等十六名授檢討著滇城日記官至侍讀告歸嘗
自爲墓誌回庫全書總目云澄中在史館與龐塏交
最契文格詩格二人往往互似今觀其集頗不類滄

溟麗塏有論文絕句云壽光安子非知已強爲于鱗
作後身論頗平允

吳元龍

吳元龍華亭人康熙甲辰進士官郎中己未名試博
學鴻詞二等十七名授待講

麗塏

麗塏字霽公號雪崖任邱人康熙乙卯舉人幼有至
性七歲時父中蠶語被逮母每夕叩天求佑塏隨泣
拜不輟母歿于束鹿館舍求佳櫬弗得哀徹鄰巷鄰
人張在田爲已母儲棺借歛人兩義之己未名試

博學鴻詞二等十八名授檢討時有明都御史某齋
夜懷金求勿入魏黨傅力拒之既而試詩賦于保
和殿不合意改補內閣中書舍人陞工部都水司主
事晉員外郎陞戶部廣西司郎中戊寅出守建寧府
甫到任浦城令以嚴苛激變邑人乘夜焚冊局殺冊
書民罷市塏聞之曰緩則變成遂兼程赴浦立傳學
典諸員名紳士集明倫堂數浦令罪且諭士民無得
生亂查倉庫及冊局叔未焚餘冊變遂定時制府惡
閩俗刁悍欲借浦示威而浦令與紳衿爲仇故用結
黨二字爲一網打盡計塏曰彼令寔甚吾可殺人媚

人耶僅坐重罪一人流一人浦人立書院祀之九仙
山或書壁曰龐公判事皎日當空慈心彌勒白臉包
公後謝政歸里時尙具慶閉戶讀書卒年六十有九

毛奇齡

毛奇齡名甡字大可號初晴人稱小毛子蕭山人
生時母張夢番僧到門寄以度牒其牒四邊有龍父因
郭璞奇齡邁五龍句命名五歲請讀書太君口授以
大學越一日已成誦時篇首有而后先後所厚三字
即以形異而音同爲問太君故作韻語以答之曰後
先厚薄音諧義衍后與後同婦行不前即忻然以解

明亡作辨亡論以見志匿不復出唐王僭號于福州
客有以漳浦黃宗伯道周蠟書招者甡辭之亡走山
寺寺僧乃爲屠首髮衣緇匿坑中王師破江東戮
留髮者甡以髡免歸先是崇正末士林好爲社每社
必集數百人撞鐘伐鼓入社者爲名士出則否甡過
嚴峻人忌之順治八年浙再舉鄉試同社章貞登賢
書偕同籍舉人昌言毛生在江東義不受職使仍爲
諸生試母使其髡首淪落可惜提學翟君是其言而
怨家洶洶甡工爲詞偶取元人無名氏所傳賣嫁女
偷二劇而反之曰不賣嫁不放偷作連廂詞提學賄

沙黑錄
得之誣請放偷縱從賊也賣嫁者歸命 本朝不待
聘而自呈其身也反之者我不然也狂生矢志訕上
官不敬上之制府下寧紹巡道王君籍捕之制府以
爲冤釋置不理值姻戚有負責道死指爲營兵屍毛
牲聚人殺營兵宜重典籍捕四出友人蔡仲先急過
曰怨深矣不走將不免由是亡命避難獲赦以原名
據原廩生籍援輸貲入國子例康熙十七年以博學
鴻詞應召 上閱一卷有云曰升于東匪彎弓所能
落天傾于北豈鍊石之可補 上夾紙籤于卷問女
媯事信否不宜入正賦否馮溥對曰在列子諸書有

之賦體本浮夸與銘頌稍異似可作鋪張 上曰如
此則文頗佳今在何等曰在上卷末 上命稍移上
卷中翼日付三相公暨掌院學士閱乃以二等十九
名同五十人賜宴禮部題名奇齡授檢討纂修明史
奇齡學問淵博多隨事考証授職後遇奇齡生日諸
同人爲祝壽奇齡復辨古無生日文著韻書十二卷
名古今通韻所著經雜說四百九十三卷奇齡初授
職時馮相國爲謀納妾時有豐臺花匠女張阿錢有
傾城姿顧不屑朱門願嫁才人西河自以老且貧恐
不當意一見許之願奉巾帚有以大婦妬恐之者阿

錢不聽于是得之嬖甚同館陳維崧見其好佛爲命
名曼殊有賀毛大可新納姬人序未幾曼殊竟鬱鬱
以卒奇齡傷之爲作曼殊別誌書碑事載虞初新志
曼殊之死京朝爭作輓弔自馮太傅梁司農兩先
生暨張曹諸學士下及舉博學鴻詞諸公詩詞文賦
不可勝紀皆彙載別集摘其警句分註別誌書碑
下

錢金甫

錢金甫字越江上海人幼工詩與父芳標唱和爲王
光承玠右吳騏日千兩高士所稱康熙己未第二甲

十一名進士榜名金甫中後復姓錢殿試歸班是年
值一名試博學鴻詞二等二十名授檢討累遷至侍
講學士金甫在史館日敝裘羸馬未嘗謁權貴倖
惟與鄉黨數故人爲文酒之會坐有語及官資遷擢
者輒怒後會其人不速至竟自避之獨與朱彝尊懽
洽無間訂爲婚姻其師卒於官金甫以俸錢治喪俄
隣人失火延及師舍即率力士負棺出火燎其鬚髮
不顧又有被遣者當出關金甫亟稱貸拮据兩晝夜
追及其車慟哭而返或暴卒于都亭外金甫犯暑疾
馳抵廬溝視其斂或陷于獄當辟金甫屢率私錢力

援之事得解其篤於師友如此嘗有贈魏惟度句云
種樹書成閒課僕賣文錢到便留賓人爭誦之著有
保素堂集若干卷朱彝尊爲序

吳任臣

吳任臣字志伊仁和人諸生以經史教授鄉里束修
所入就市閱書善價購而藏之故著述最富康熙十
一年戊午舉博學鴻詞 名試諸公滿長安市宴會
請名無虛日時關中李天生與志伊俱寓益都馮相
國處一日閣學李天馥會宴志伊在坐會天寒天生
衣短貉裘而來毛色粗惡李曰是當內其毛而衣之

天生怫然曰是反衣也獨不聞反裘而負薪者乎曰
皮之不存毛將焉附是內毛者反裏也李曰然則羊
裘如何曰羊裘賤服恐負薪所衣卽此但毛色所尙
古無明文然定無有從內向者時毛奇齡寓李處李
以問之奇齡曰毛色不內向極是但羊裘用純黑論
語羔裘元冠緇衣羔裘以冠衣黑色表毛色也詩曰
羔羊之皮素絲五紵惟黑毛向外當用白絲五條嵌
之使黑白分明以爲飾此非外向乎至狐羊貴賤不
可考然體器諸侯有黼裘以誓省大裘非古也據解
者謂以黑羊雜狐白相間而成文者謂之黼裘純黑

羊皮謂之大裘是天子用純黑羊裘諸侯用之即謂之非古是非尊黑羊而賤狐白乎李以問志伊志伊曰觀黼裘誓省狐裘祭蠟論語狐裘之厚以居則狐用卑褻自不如羊裘祀天之尊也且檜詩曰羔裘迨迨狐裘以朝則羊裘狐白雖皆可用為朝服然狐多羊少則詩人譏之此亦貴賤之一驗也天生乃笑曰田文以狐白脫秦患而五羊之皮則秦人薄之國策曰千羊之皮不如一狐一腋若此果何貴何賤也志伊曰羊之價焉得如狐但歷觀羣書似乎羊裘價賤而用貴狐裘價貴而用反賤也坐客皆是其言時益

都相國開宴萬柳堂志伊先在舍與上虞徐咸清仲山以辨字與志伊不合將遊天欲兩外舍諸公有舉志伊所撰字彙補中水雲角鱗為言者仲山曰呂覽水雲魚鱗未聞角鱗也諸公大驚且曰魚角鱗鱗字形之誤此必坊本所刻有誤而志伊據之此固不關學問者仲山復辨曰淮南子亦有之山雲章莽水雲魚鱗何不更考淮南子乎衆大憾毛西河曰志伊是有學學亦何減仲山此偶誤耳不得以鄭康成註經十誤二三遂謂康成非通儒也十二年己未 試體仁閣榜發志伊取二等第二十一名授檢討纂修明

史而仲山又與高陽相國論查字義不合故益都力薦而高陽終無一言及遂被放志伊嘗作山海經廣註十八卷以郭註列于前而以任臣案考訂于後較楊升菴補註援据廣博多所訂証又著十國春秋一百一十四卷書成以示寧都魏禧水叔禧爲之作序稱之曰史才

陳鴻績

陳鴻績字子遜鄞縣人順治十四年丁酉舉人候補知縣己未試博學鴻詞二等第二十二名授檢討纂修明史有早朝詩云卿雲遠闕鬱容巖閭闔朝門

近碧霄聲暢鳴鸞應問夜班聯振鷺共趨朝瑤階瑞集舒蕙葉青瑣風輕漾柳條咫尺天顏同肅拜堂簾深處奏簫韶高士竒選入鳳池集

曹宜溥

曹宜溥字子仁號鳳崗湖廣黃岡籍江西東鄉人廕生己未試博學鴻詞二等第二十二名授檢討戊辰告歸朱彝尊有同諸君聖安寺餞曹檢討詩有一恍挂楚澤百尺卧江樓之句聖安今普濟寺也

毛芳升

毛芳升字允大號乳雪遂安人拔貢生試博學鴻

詞二等二十四名授檢討乞假歸闕六年始補官故
朱竹垞飲芳升寓中詩有城隅燒尾宴曾同六載重
來就菊叢之句

曹禾

曹禾字嘉頌號峩眉江陰人康熙甲辰進士官中書
已未 試博學鴻詞二等二十五名改編修京城東
萬柳堂馮相國休沐地也擇日開宴遍請諸應召者
來會賦詩同館毛奇齡即于席間作萬柳堂賦呈相
國稱第一喬萊工賦者也然喜事與禾同舍均好臧
否人物禾是日未至萊伴寫奇齡賦作已賦以示禾

如何禾曰此非君作也然則誰作禾曰必江東毛生
也萊大笑時傳為佳話見西河王士禎常選其詩為
十子詩畧十子者商邱宋犖邵陽王又且安邱曹貞
吉黃岡葉封江都汪懋麟曲阜顏光敏晉江丁焯德
州出雯謝重輝及禾也

黎寯

黎寯江西清江人貢生己未 名試博學鴻詞一等
二十六名授檢討纂修明史未幾卒

高詠

高詠字阮懷號遺山宣城人幼有神童之目工書畫

涉墨金
詩世稱三絕與同里施閏章愚山梅杓司耦長友善
過從無虛日清談唱和非是卽剝啄頻聞不應也弱
冠爲諸生屢試第一上公車前後十五不中年近六
旬始以貢入大學時崑山相國徐元文竒其才延致
家塾一日酒間相國舉觴屬曰先生早歲卽藉其聲
名欲一見顏色不可得幾作天外人想今不意屈致
且幸且慙敬以此觴爲先生壽詠唯唯取酒立盡絕
不作遜謝話滿座驚歎其簡傲若此已未舉博學鴻
詞二等二十七名授檢討纂修明史未幾假歸詠少
時嘗夢于市上行見大幅字狼藉盈街不敢踐尋劍

路行不覺輕舉入雲中忽至一所樓閣壯麗踰橋人
門有黑而髯者似壇神右兩目焰焰擁皂纛自內出
避之神睇而顧問纛卒有所言者再乃去遂行門未
啟見門左冕而執笏者甚衆心知爲天庭也有導者
引至右旁殿額曰三官堂有公坐三黃袍畫臯比私
念何可據三官座遂出復引至文昌宮以第三座命
之曰可坐此驚而寤詠爲作飛龍引紀之壬子貢赴
廷試至五鳳樓金水河訪佛夢中以爲兆應矣至是
授史官復夢前境心頗惡之以疾歸里起居如常每
語人曰當以二十八日辭世究不言其故次年二月

卒果二十八日也潘耒挽詩云垂老一官榮地下酷
貧佳句滿人間實錄也曠園雜志有遺山堂若巖堂等集
鄭方坤國朝詩家小傳云論者謂己未薦舉諸君文
章之爾雅不必言而難進易退立身光明高風亮節
亦豈長安冠蓋中所易覲擬之天牛朱霞可望而不
可即如阮懷者庶可當此言無愧矣

龍變

龍變字雷岸安徽望江人監生己未 試博學鴻詞
二等二十八名授翰林院檢討改刑部郎中三十四
年乙亥 駕在暢春苑部務稍暇五月中王士禎與

同人諸及門間為結夏文字之會賦得五月賣松風
人間本無價俱用古人五月成句為題變詩云岸悄
披襟意爽然憑誰索價且高懸東坡只欲時人買剛
道清風值萬錢滿袖清風且嘯歌紛紛觸熱客何多
涼風爭似涼州好此價惟須問孟佗變工詞曲有瓊
花慶芙蓉城諸傳奇

邵遠平

邵遠平仁和人順治十四年丁酉舉人榜名吳遠字
戒三康熙三年甲辰進士榜名吳邵遠字遠平本姓
邵改歸本姓遂以字行改庶吉士累官至光祿寺少

卿已未 名試博學鴻詞二等二十九名授翰林院侍讀官至詹事少詹事四庫全書總目云遠平有京邸集自序謂已未入京五載內所作多典禮紀頌之章酷摹唐音頗見宏瞻今傳戒菴詩一卷有長洲韓葵序謂其使粵時唱酬甚富別為集以行于世則此乃全集之一種也

嚴繩孫

嚴繩孫字蓀友號藕漁無錫人自號句吳嚴四善書法工繪事司寇一鵬之孫已未 名試博學鴻詞是日以目疾僅為省耕八韻詩已置不錄中卷 上觀

閱卷問衆大臣曰有不完卷者何以列在中卷衆曰以其贖詞可取也至折卷畢斥去一卷 上命擇一有名者補之時中堂掌院各有所薦皆不允最後馮溥以徐咸清薦亦不允 上自取繩孫卷補之即前云中卷中不完卷者制科雜錄遷中允與試山西有瀛臺侍宴七言絕句詩二十首流傳都下朱彝尊序以付梓其歸也有春日蒙恩予假南歸詩云不是恩深使拂衣涓埃生死報應稀吳牛避熱先愁喘宋鷁衝風且退飛十載青雲雙鳳闕三春紅雨一漁磯去來我亦無心者何必從人定是非又云搏飛端不到青冥

高足都看幾要津。遮莫吾今先喪我。由來臣少不如人。人生同王琰。貧來久世識。稽康懶是真。文酒故交雲雨散。夢魂相望落花春。詞婉而調高。酷似梅村歸田後。杜門不出築堂日。雨青草堂亭曰夫亭。布以窠石小梅方竹。宴坐一室。以為常。晚歲有以詩文畫請者。靡不應暇。輒埽地焚香而已。年八十卒。有秋水集十卷。驛書亭集誌銘子宏曾字人宏。世其學。畫徵錄以上五十人

野翰林

本朝已未名試博學鴻詞。其中人材德業理學政治文章詩翰品行事功無不悉備。洵足表彰廊廟。不負

聖明鑒拔掄才之典于斯為盛。而一時落第挾私嫉妬者。妄肆蜚讒。呼為野翰林。譏以詩曰。自古文章推李杜。而今李杜亦稀奇。葉公懷懂遭龍嚇。馮婦癡呆被虎欺。夙構零軒衡玉賦。失粘落韻省耕詩。若教修史真羞死。勝國君臣也皺眉。李謂高陽相國霽也。杜謂寶珉相國立德也。葉謂掌院學士方霽也。馮謂益都相國溥也。時上命內閣諸學士各擬題。上用李擬璇璣玉衡賦及杜擬省耕詩。有言先試一日。傍晚相傳有規知題者。故云宿構失粘落韻。謂施閏章潘耒李來泰也。而未卷嚴繩孫又未完卷。故造言生

事如此又纂趙錢孫李周吳鄭王笑談更屬輕薄見在園雜志

欽命題

璿璣玉衡賦省耕詩十六韻王阮亭稱氣味古茂准李來泰賦盛袖堂稱精切不浮推潘稼堂賦

讀卷官

高陽大學士李 賈坻大學士杜立德 益都大學士馮溥 閣學景襄李天馥 掌院葉方霽

名試不取 特賜編修一人

勵杜訥字近公其先浙江人祖宏遷于靜海遂家焉

杜訥年十九為諸生學問淵通尤善書法以繕寫

世祖實錄議叙除福寧州佐 特旨留侍內廷食

六品俸會 名試博學鴻詞于 體仁閣報罷特授

翰林院編修累遷刑部右侍郎杜訥久侍 內廷小

心慎密居憲職正色侃侃無所瞻徇九卿會議一言

首倡議隨定出入禁苑二十餘載前後疏奏多所建

白年七十六卒賜諡文恪雍正九年 特旨追贈禮

部尚書十一年入祀賢良祠

給中書舍人銜六人

杜越字君異號紫峯直隸定興人前明諸生受業于

本色鹿繼善平生惟以講明道學為事鄉里推為耆宿詩非其所長已未舉博學鴻詞以年授中書舍人銜回籍有紫峯集十四卷 傳山字青玉山西陽曲人少聰慧博通經史諸子工詩文兼長分隸書及金石篆刻善畫山水皴擦不多邱壑磊砢以骨勝墨竹亦有氣崇禎間山西督學袁臨侯為巡撫張孫振以誣劾被逮山伏闕 上書白其冤馬君常為作義士傳亂後為道士裝以醫為業年八十已未舉博學鴻詞以老授中書舍人銜回籍後變姓名為公之侘子肩字壽毛亦工畫善作古賦常賣藥四方父子共輓

一車逆旅篝燈課讀詰旦成誦乃行詩卷零落沈德潛別裁登其送友之秦一首有戰地驚鴻鴈秋闈怨駱駝句亦雄壯 王方穀字金粟直隸新城人已未薦舉博學鴻詞以老授中書舍人銜回籍 朱鍾仁本姓邨字近夫崑山人已未薦舉博學鴻詞以年賜中書舍人銜回籍著有春秋遵經集說二十四卷 申維翰江都人已未薦舉博學鴻詞以老授中書舍人銜回籍 王嗣槐字仲昭仁和人已未薦舉博學鴻詞以老授中書舍人銜回籍 吳任臣海鹽徐林鴻蕭山毛奇齡宜興陳維崧咸為

大學士馮公延致邸第稱佳山堂六子

給司經局正字銜三人

孫枝蔚字豹人陝西三原人少爲諸生卓犖負奇氣
遭流寇與其鄉少年奮戈逐賊落深塹得不死乃走
江都嘗從賈人致千金散之乃僦居董相祠自題其
室曰漑堂局戶讀書王士禎訪之先以詩云焦穫奇
人孫豹文新詩雅健出風塵王宏不見陶靖節端木
寧知原憲貧遂爲莫逆後士禎內遷諸人送別禪智
寺枝蔚有欲問忘情老何名共命禽一日遊焦山中
流過風賦詩云風起中流浪打船秦翁失色海雲邊

也知賦命原窮薄尚欲西歸太華眠已未薦舉博學
鴻詞以年老授司經局正字回籍初得正字賦詩云
一官如籠鶴萬里本浮鷗賦曾非宴童年况異劉
山人今上路少婦免登樓臨水看蝌蚪惟添錯字愁
著有漑堂集十三卷 王昊字惟夏太倉人王士禎
之裔孫婁東十子之一尤錚錚有聲已未薦舉博學
鴻詞以年老授司經正字著有碩園集吳鄧漢儀稱
其詩簡雋似韋柳 鄧漢儀字孝威授正字歸海陵
詩有一出還歸隱白雲商洛東之句漢儀工詩學爲
騷雅領袖太倉吳梅村合肥龔芝麓皆與爲唱和嘗

品次近代名人詩爲詩觀初集二集三集若干卷別裁海內言詩之家咸宗之嘗同龔端毅入粵過梅嶺有句云人馬盤空細烟嵐返照濃王士禛稱其寫景逼真

給翰林院待詔銜一人

張貞字起元號杞園安邱人康熙壬子拔貢生舉博學鴻詞名試授翰林院待詔銜博雅好古能鑒別書畫出彙之屬精金石篆刻間歲出遊吳越不通鈴下與高士名僧邂逅山水間觴詠以爲樂既而購書千百卷浩然以歸

李箕菴張先生墓表

先生居杞城故墟以古石

杞宋無徵之歎博引古書作杞紀二十二卷阮亭先生謂其體大思精深得太史公家法勉厚堂集安雪園張先生傳

薦舉名試被放可攷十五人

徐咸清字仲山上虞人已未名試博學鴻詞填榜日上以取中上卷中有不完卷者命擇一有名者補之時大學士掌院各有所薦皆不允最後益都馮相國以咸清薦上曰有著作乎曰有資治文字若干卷上曰資治文字何書也曰字學也傍一學士曰字書小學耳遂置不問又以與高陽相國論查字義不合故

馮相國力薦而高陽獨無一言遂被放人謂其恐以此稍芥帶威清既放歸輦下鉅公贈行云北闕上書爭識西京才子東軒賜食歸貽南國佳人一時艷稱之雖不得仙亦足以豪云 吳雯字天章山西蒲州人授臨潁縣知縣進士允升之子舉博學鴻詞放歸王士禎云天章入京師未知名一日待漏朝房誦其句于葉訥菴云泉遶漢祠外雪明秦樹根濃雲濕西嶺春泥沾條桑又門前九曲崑崙水千點桃花尺半魚葉大驚異下直卽命駕往訪之吳詩名大噪都下己未以鴻博徵赴京師獨不掃門時相被放歸天章歿後漁洋手

定蓮洋集鈔本 李良年字武曾浙江秀水人博學鴻詞放歸有秋錦山房集地北偶談方爾止事多可笑一日與李武曾書故作增李見曰先生誤矣某字武曾非增也方曰吾正恐人誤作屠 吳農祥字慶百一字星叟錢唐諸生也己未開博學鴻詞科農祥以大司空陳啟永薦試 太和殿農祥試卷在中中已中矣已而不與 上又顧大學士舉所遺首以農祥薦又不與或曰是有以蜚語聞者或曰是索其卷無有故罷其事秘不可知也時稱佳山堂六子吳下士沿復社故態角尊門戶各不通水火而浙西郡若

讀書秋聲登樓孚社及慎交諸社爭立名字應之各
欲引農祥書蔽交戶外者屢且滿農祥曰是載甌見
餉也諸君子忘東京鉤黨事乎不答書亦不發視其
後 天子果切齒諸爲社事者盡搜所刊錄摧燒之
于今著爲合世咸以農祥爲知幾後李文襄公之芳
聘入幕甚重之卒年七十七初農祥之生也母張夫
人夢偉衣冠者七人抱一兒授之曰以爲而子請其
年曰二七及是果驗 宋寔穎字既庭號湘尹長洲
人少爲諸生受知于徐汧順治辛卯舉順天鄉試與
吳下諸名人倡慎交社聲譽籍甚後以江南奏銷案

註誤康熙戊午復還舉人已未以博學鴻詞名試罷
歸久之授揚州興化教諭才名早著年三十至京師
自名公訖四方遊士無不持謁以望見顏色爲幸與
宗弟疇三齊名時稱大宋小宋說寔穎常作黜朱梁
紀圖論王士禎謂其義正 閻若璩字百詩太原人
徙居山陽已未薦舉博學鴻詞被放所著有古文尙
書疏證八卷毛朱詩說一卷潛邱劄記六卷 魏學
渠字子城號青城嘉善人少負雋才柳州八子之一
順治戊子舉人薦舉博學鴻詞報罷放歸時蜀中初
定區畫嘉眉邛雅四州賦額改定例過嚴者十餘條

內陞刑部主事丙午順天同考官以得人稱歷湖廣
提學僉事補江右湖西道 馮行賢字補之常熟人
父班字定遠後京仲子與兄舒齊名工詩嘗謂王李
死擬盛唐詩道于是大壤矣又謂韓吏部之文古文
也歐陽公之文只是今文不如唐人四六尙有古意
古音書法四體皆佳尤工小楷有晉唐人風致其爲
人落拓自喜奴視法度意所不可掉臂去胷有所得
曼聲長吟經行市中屢陷于淖衣裂其幅望望然去
之旁若無人當其被酒憤懣輒就座中慟哭人亦不
知其何以錢詩所謂願就馮班慟一場者也班行一

時稱爲二癡行賢弱冠能詩工書法尤精篆刻嘗薦
舉博學鴻詞報罷第行貞字服之善擊劍攢槩嘗從
康親王南征工畫松石族弟武字寶伯亦善詩善書
著書法正傳二卷舒子修字念修從陳瑚游工詩著
東村仙源集 陳元輔字翼王嘉定人薦舉博學鴻
詞時王文貞崇簡招朱葵尊嚴繩孫毛會建錢澄之
陳祚明計東讌集豐臺藥圃元輔與焉竹垞有一老
風流獨羣賢少長并之句先是陸稼書爲嘉定令罷
官後光輔來見稼書稱爲博學樸定君子往還甚密
光輔家多藏書從其借抄者無虛日光輔爲言孫北

海承澤所著書皆有益于學者博學之士多萃其門相助校對朱錫鬯顧寧人其二也至是稜書亦薦舉來京光輔曾在浙江學使署中閱文同事有于以皮冠文抹獸人司原者欲直言其失則不悅因婉商之曰依稀記得左傳上有此句署中無左傳合取韻書查得之其人仍批曰雖出左傳殊屬不雅稜書聞之曰翼王處此可謂直而婉處世之良法也陸先生年譜尋名試被放歸 陳莢秀水人生員已未薦舉博學鴻詞被放歸嘗有范少伯祠詩云水榭藏仙梵馮欄輒惘然鴟夷誰汎宅蝦舍斷歸船網艷蛛絲密臺荒雉

蝶懸會稽山在望高處沒蒼烟 宋維藩字白山賦

溪人有方向節者字石卿長不滿五尺背偃僂多笑工卜易以維藩為東道主連歲或不歸方春始和白山必令翁卦以占歲祥一日卦畢忽呼音音語白山曰今歲當有人自 天子所來名君者謹識之白山颯然曰所以煩君卦者姑以問安否何如耳窮閭隘巷與外間孰為翰音登于天者而有命自天乎尚節曰書言之固然謂余不信則卦書不可用也是為康熙戊午是歲也 天子開制科有刁公子者豪舉士也舊與白山為至交方壯遊時際白山金錢無算已

乃別去濶焉不聞問者歷年會制科開公子念白山厚意人不報自從其所屬相知有氣力者以白山名上遂登辟書白山初不知也辟至乃嘆尙節術神被放歸許儒龍字水南成都人著有岷南詩草范鄔昂字彪西洪洞人所著有理學備考廣備考王士禎爲序王嗣槐字仲昭仁和人薦博學鴻詞被放王宏字無異號山史仁和人已未薦博學鴻詞被放羅坤字宏載號蘿村會稽人諸生康熙己未名試博學鴻詞被放著有蘿村詩集薦舉丁憂未與試三人

平湖陸清獻公稼書以工部都水主事陸源起準菴薦公理學入朱程之室文章登韓柳之堂公聞之曰此非余所居然豈不可自勉三月就道四月到京魏公環極素重公而未識面因詢于同邑陸御史祚蕃陸對以避嫌不敢公曰然則吾當先往因率其子學誠學謚謂曰汝輩奉爲典型八月魏以公合嘉定時汪標一案部議援諱盜例疏爭曰陸隴其廉介之官也清操飲水愛民如子賢聲播于都下臣心竊重之謂異日可步于成龍之後塵者此人也乃未幾該撫慕大顏疏稱隴其守絕一塵才非肆應德有餘而才

不足又被盜案部議革職例之所在臣不暇問但有此清介之官正當為羣僚作榜樣為百姓作慈母今之有司守與德為難耳既知其守與德矣何不罷留以長養百姓云云有旨報聞一時傳誦十一月以封公卒于九月二十一日開訃即徒跣出都二十九日抵家未與試己未十八年十月魏公疏薦操守清正十人公其一也遂有復職之命見年譜餘事蹟見前 黃虞稷字虞邵一字楮園晉江人舉鴻博以丁母喪不與試 彭桂字爰琴溧陽人舉鴻博以丁憂未與試俱見曝書亭詩註

薦舉以病未與試一人

魏禧字冰叔寧都人甲申後棄去諸生從父兆鳳結廬翠微峰與同志九人為易堂學九人者南昌歐士望林時益寧都則李騰蛟北維屏彭任魯燦及禧禧之兄弟第禮時燦兄畹盛才名號二魯以領鄉薦不得預祥亦時出佐大師戎幕跡介隱顯之間堂中以竹林山王待之八人皆巖處躬耕有名于江右自歐陽鄒魏祖陽明講性學陳艾依復社工帖括聲力氣燄學者景從易堂起而以古文寔學為歸風氣為之一振由禧為之領袖也已未舉博學鴻詞禧在舉

中以疾辭郡縣督趨就道昇疾至南昌醫藥累月稱篤罷歸未試卒年五十七著有文集二十二卷詩集八卷

薦舉辭不赴二人

顧景星字赤方一字黃公蘄州人八歲賦鰲山燈里中稱爲神童康熙戊午舉博學鴻詞辭不赴著有白茅堂集 王鉞字仲威號任菴諸城人順治十五年戊戌進士知西寧縣八年吳三桂叛鉞度尙之信必叛移疾歸杜門課授益博綜典籍康熙戊午舉博學鴻詞辭不赴著有水西紀畧粵遊日記星餘筆記讀

書最殘暑窓臆說朱子語類纂世德堂詩文集

淡墨錄卷六

栢梁

蜀綿 李調元 兩村

康熙二十一年元夕前一日 上饗羣臣于乾清宮
 作昇嘉宴倣栢梁體詩 御製首倡云麗日和風被
 萬方和者自內閣大學士已下凡若干人滿大學士
 勒德明珠皆拜辭不能 上連代二句曰卿雲爛熳
 彌紫闈一堂喜氣歌明良且戲曰二卿當各酌一觴
 以酬朕勞二臣果捧觴叩首謝王士禎以祭酒領成
 均句云三德六行為士坊翊日詩成恭進 上手製

詩序 御書之詩則 詔故詹事禮部侍郎沈文恪
荃書之刻石養心殿摹揚裝潢九月九日 宣賜與
宴臣人一本真昇平盛事云

門弟帖

金德嘉字會公湖廣廣濟人順治十七年庚子舉人
就安陸府教授不肯會試一日夢劉子壯以門弟帖
拜之因北上是年康熙二十一年壬戌會試總裁爲
掌院學士朱之弼子壯已丑會試本房也果中第一
夢兆之異如此奉 命修詠物詩類

徵元

德清蔡升元初生時其父啟賢夢金甲神持紅箋大
書報單云第一甲第一名蔡升元遂以名之而字曰
徵元康熙二十一年壬戌果大魁是科榜眼石門吳
涵探花長洲彭寧求丙辰會狀定求弟也

賢祭酒

吳苑字楞香歙人康熙壬戌進士由編修陞祭酒僅
百日故事凡國子生初謁者有贄見之費歲滿咨部
者有咨部之費俱禁之諸生遂無一錢之費又以題
名碑自丙戌以後十八科未立次第補立當代稱爲
賢祭酒

會試十本進呈之始

康熙二十四年乙丑狀元爲長洲陸肯堂先是進士無十本進呈之例是科總裁刑部尙書張士甄始以前十本恭呈 欽定上拔肯堂第一由修撰歷陞侍讀榜眼爲海寧陳元龍探花爲漂陽黃夢麟

賦彙

海寧陳文簡公元龍歷官至大學士爲詹事時乞假養親 先是 上開賦彙館以文簡總裁至是乃命攜歷朝賦彙還家校刊工書法人得之皆爲裝潢著有愛日堂詩集查爲仁云家有陳章侯蓮鷺圖

文簡公題云墨花吹得綠差差小景分來大液池白鷺不飛蓮不謝搖烟立雨已多時人服其工

天下第一清官

張清恪公伯行康熙乙丑進士歷至江蘇巡撫素以清節理學著名四十八年大計盡除吏之貪婪不職者萬民鼓舞而總督噶禮貪黷怙勢素與齟齬辛卯科場事發 上命刑部尙書張鵬翮往鞫亦畏其勢伯行抗疏 上言噶禮營私壞法有曰仰祈 皇上大奮乾剛除兩江之民害快四海之人心振萬古之綱常培一時之士氣疏出人皆傳誦噶禮亦誣伯行

不肯出洋數事 上命並解任 命工部尚書張廷樞來鞫並擬革職 上責諸臣顛倒是非革噶禮職留伯行巡撫任且諭諸大臣曰伯行乃天下第一清官噶禮辦事歷練若操守朕未能信若非張伯行在江南地方受其侵削一半矣當是時中外無不頌聖祖知人之明獨斷之哲

杜詩詳註

仇兆鰲字滄注鄞人康熙二十四年乙丑進士改庶吉士授編修甲戌五月十五日上諭翰詹輪直南書房試詩賦得衣露淨琴張限韻五微五言律是日

兆鰲稱 肯所注有杜詩詳註二十五卷附編二卷康熙三十二年兆鰲奏進凡詩注二十三卷雜文注一卷後以逸杜咏杜補注論杜為附編上下二卷其總目自二十八卷以下尚有做杜集杜諸卷皆有錄無書疑欲續為而未成也每詩各分段落先詮釋文義於前而徵引典故列于詩末其中撫拾類書小有舛誤者如注忘機對芳草句引高士傳葉幹忘機今高士傳無此文及太平御覽所載稽康高士傳幾盈二卷亦無此文又注宵旰憂虞軫句不知二字本徐陵文乃引左傳注旰食引儀禮注宵衣考之鄭注宵

乃同綃非宵旦之宵也至吟杜卷中載徐增一詩本
出其說唐詩中所謂佛讓王維作才憐李白狂者蓋
以維詩雜禪趣白詩多逸氣以互形甫之謹嚴兆鰲
乃改上句爲賦似相如如此之類徃徃有之皆不可
據爲典要然援據繁富而無千家諸注僞撰故實之
陋習核其大局可資考證者爲多洵善本也

主考命題悖謬

康熙二十六年丁卯福建主考王連瑛策問臺灣事
宜一道 上閱題名錄 諭大學士王熙第曰各省
鄉試主考朕未深知於開列中酌量分遣今覽題目

多有未當策問臺灣于地方情形毫未通曉乃茫昧
命題殊爲悖謬其餘各省亦未盡當爾等詳加校閱
察出恭奏于是察得福建雲南河南三省主考分別
各降級調用從之見 聖祖寶訓

救父

康熙二十七年戊辰狀元爲秀水沈廷文字原衡年
二十以父仲霖于 王師入粵時未卽歸順監禁廷
文哭訴軍府得釋年已七十廷文官修撰爲介壽同
里陶越引言有孝子身經百險倖覲止于鯨波鱷沫
之餘孤臣跡越千鄉正徬徨于電閃沙驚之候之句

輦下盛傳

五色雲中第二人

海寧查嗣韓字荊州以五經鄉薦不第留京住西華
敞劉廷璣宅之無倦軒攻書身素弱劉勸慰之曰吾
非不知曾夢神贈詩有五色雲中第二人句是以戀
戀異其一驗耳至康熙戊辰果以榜眼及第俗云京
中爛麩衲衲最不利于榜眼未幾果卒事見曠園雜
志是科探花青浦張豫章會元鄞人范光陽卽天一
閣藏書范家也

老查小查

查昇字聲山榜姓邱海寧人戊辰進士由編修至詹
事工書法供奉內廷昇與叔同生于庚寅昇長慎行
一月後慎行始登進士入翰林相距八年 上前奏
帖班次皆在慎行前 東宮召對每呼慎行曰老查
昇曰小查以別之

誕如卜日

田從典字克五山西陽城人初母白夫人誕公時父
卜于神得丙戌吉日佳果以是日誕五歲能誦四書
十歲爲文與故浙撫張泰交齊名時稱田張戊辰成
進士是科多名下如長洲何焯號知文推公第一云

官至文華殿大學士戊申予告卒于良鄉驛館壽七十八謚文端

文光果詩

仁和湯右曾西崖康熙戊辰進士官至吏部侍郎兼掌院學士少工詩見賞于王士禛 聖祖以問學士揆叙曰右曾工詩令以集進遂以作文光果詩上覽並賜和焉今刻懷清堂集中論者謂浙中詩派前朱竹垞後湯西崖竹垞學博西崖才大後有作者莫越兩家外

歸舟口號

蓮坡詩話嘉定孫致彌松坪康熙戊辰進士官編修髫齡卽以詩供奉禁中四十年有歸舟口號云有淚何曾洒路窮小船欹側逆流中科頭白眼傾尊酒飽看人家使順風足見磊落曾懷

六十館選

南海梁佩蘭字藥亭年未三十領解元至康熙二十七年始登進士入翰林選庶吉士年已六十矣有詩名與屈翁山大均陳元孝恭尹號嶺南三家散館改知縣同改三十人俱赴吏部選佩蘭獨不肯而輦下無論識與不識皆尊求詩宗室戚畹迎迓無虛日或

藏延留別業不令見他客以矜獨得士林或詢不知名卽面有慙色其名重如此有六瑩堂集

對策用清漢兩書

殿試策例有規式違式輒不得與上第康熙二十七年戊辰仁和凌紹雯少習清書殿試對策遂用清書漢書兩體寫之讀卷官奏請 上裁置二甲之末選庶吉士

接見羣臣

居易錄康熙二十九年 上在 乾清宮頤養者久之忽八月十八日 上諭內閣甚欲一見內閣部

院大臣先是 駕在塞外偶違和還宮未 御門接

見羣臣已十日矣內閣九卿等每日詣後左門起居

聞 旨皆踴躍十九日午鼓集後左門辰刻 上御

乾清門有旨召羣臣入大學士尙書等奏請 聖宮

萬安 上微笑領之仰瞻 天顏神色充悅羣臣退

以手加額相賀

順天鄉試房考用知縣

庚午順天鄉試官翰林院侍講學士王揆編修魏希徵同考試官知縣何訥等十五人舊例順天鄉試考試官例用編修檢討皆史官也武試則用侍讀侍講

特用講學防揣摩也同考試官例用京官員外郎主
事中書舍人行人等官用外官自是科始

東宮講書

二月十四日王士禎與工書兼詹事桐城張英少詹
兼侍講學士馬邑田喜霽啟奏 東宮春季會講題
目及講官職名講官 欽點張英及諭德李鎰四書
擬進二題博學而篤志節誠者非自誠已而已也節
欽定君子不重則不威章仰歎 豫教之切一命題
亦不忘訓誡如此聞 上在宮中親為 東宮講授
四書五經每日 御門之前必令將前一日所授書

背誦覆講一過務精熟貫通乃已士大夫家不及也

殿種五穀

田詹學喜霽子涓言 上在暢春苑每引見諸臣常
御澹寧居止三楹不施丹雘亦無花卉之觀其西即
無逸殿 東宮讀書處殿外種藝五穀之屬蓋欲子
孫知稼穡之艱難意深遠矣

問伊川雷起之說

三月初一日 上傳問內閣學士邵子問伊川雷起
于何處伊川曰起于起處邵子愕然稱善何謂也大
學士徐元文對邵子言數王士禎云按伊川答晁以

道書云頤與堯夫同里巷居三十餘年世間事無所不問惟未嘗一字及數卽此知邵程之學異而同處按堯夫顯暹禪師亦有闡雷示衆一則

翰林改京堂官

京堂官多缺員 上命以翰林詹官改補自庶子至編檢悉列上 欽點左春坊左庶子李應薦爲太常寺少卿翰林院侍講顧藻兵部督捕右理事官仍提督順天等處學政國子監司業吳涵編修王九齡俱通政使司左叅議右庶子高裔司經局洗馬周清原俱改小京堂官

大祀必躬親

十一日祭祈穀壇 上偶患癩未痊令內閣禮部太常寺集議查照典例請遣官恭代 上疑之初七日復下九卿集議議如前閣臣啓奏得 諭旨仍令照例進銅人于宮中齋戒蓋 上登極三十年以來凡郊 廟大祀無不躬親雖大雨雪必出敬 天尊祖久而勿怠如此

元旦賜酒

康熙三十年辛未元旦 上御太和門受朝賀午賜宴召滿漢內閣大學士學士六部尙書侍郎都察

院都御史副都御史上殿 賜酒是日風日暄霽仰
瞻 天顏悅豫羣臣皆喜

不解講官

命禮部尚書熊賜履兵部督捕侍郎王士禎俱以原
銜充經筵講官先是大學士徐公元文以兼領翰林
院掌院事不解講官去年某月罷禮部尚書張公玉
書爲文華殿大學士例解講官翰林院以部院由翰
林出身諸臣名上留中數月至是以仲春經筵屆期
特有是 命

辛未十本主考自定

辛未二月初六日晨內閣九卿啓奏 乾清門辰刻
奉 旨以戶部尚書文華殿大學士張玉書 經筵
講官工部尚書陳廷敬兵部右侍郎李光地 經筵
講官兵部督捕右侍郎王士禎爲會試主考官禮部
左侍郎王勵昌爲知貢舉官同考十八人翰林院編
修許承家等七人兵科掌印給事中卞三畏等四人
吏部郎中鍾義傑等七人宴于禮部 賜金花綵緞
表裏各有差宴畢入鎖院二十七日恭呈十卷進
御覽次日奉 旨着考試官自定次第先是二十四
年乙丑科會試主考官刑部尚書張公士甄等始進

擬十卷恭請 上裁 欽定名次以陸肯堂爲第一
戊辰已來遵爲定例然戊辰亦未 欽定是科放榜
中式舉人百五十六名會元張瑗江南祁門人滿洲
巴海等四人烏金超哈胡麟徵等二人

會試分省

掌河南道監察御史王承祐疏請以安慶廬州鳳陽
三府滁和徐三州仍歸南卷舊例會試以廣西四川
雲南貴州四省及江北三府三州爲中卷自丙辰科
以滇黔亂去中卷之名以三府三州歸南卷雲南平
復舊是科榜發廣西雲南三省遂無一人入彀者故

言官有是御史江蘩亦言之上俱交九卿部議以直
隸山東爲北左河南山西陝西爲北右江南浙江爲
南左湖廣福建廣東爲南右四川雲南爲中左廣西
貴州爲中右得 旨允行著爲令

對策倣陸宣公

二十三日 御太和門傳臚 賜中式舉人戴有祺
及第第一初讀卷官內閣九卿擬吳昺第一有祺第
二楊中訥第三旣進 御覽改有祺第一昺第二黃
叔琳第三中訥居二甲之首昺全椒人故禮科給事
中國龍子對策倣陸宣公奏議 上以書法拔有祺

狀元而曷次之又以鼎甲久無北人拔叔琳次芮叔琳大興人中訥海寧人兵部左侍郎雍建子遇合之有定數如此

狀元非本科

戴有祺戊辰進士休寧人籍華亭 本朝狀元非本科中式者壬辰之鄒修撰忠倚己丑中式甲辰之嚴侍郎我斯榜眼李都御史元振皆辛丑中式及此而

鼎甲風水

人家科第在積學種德堪輿之說非所論也然亦有

灼然可信者榜眼全椒吳曷述其曾祖體泉翁爲父卜吉壤延閩人簡堯坡者于家廩餼甚厚簡日爲擇兆域三年不可得辭歸翁固留之一日同往梅花山中遇大雪同飲陳家市酒樓簡倚檻遠眺久之罷酒起曰異哉吾遠近求之三年不得乃在此乎即同往三里許審視良久曰是矣雪晴更往觀之喜曰天賜也得此地足報君矣然葬後君子未卽發至孫乃大發發必兄弟同之對面文峯秀絕發必鼎甲然稍偏未必鼎元或第二第三人亦不僅一世而止翁如言卜葬其後孫國鼎字玉鉉中崇禎癸未進士國縉字

淡墨錄
玉林順治己丑進士國對玉隨國龍玉駟學生玉隨
順治戊戌進士及第一甲第三人官翰林侍讀士駟
亦癸未進士官禮科都給事中至昂兄弟又前後舉
科第而昂登辛未科及第一甲第二人簡之術亦神
矣

吏治真文章

楊名時字吉士江陰人康熙辛未進士雍正時由編
修歷官雲南巡撫謝 上賜御書疏有云龍文璀璨
鳳藻騫騰揮毫煥雲漢之章振腕挾風雷之勢語
上諭曰觀爾于講論文字便覺精神煥發殊不知吏

治乃一篇真文章也若徒紙上空言而吏治毫無實
際豈聖門之所謂學哉

辛未名臣

辛未名臣如陳恪勤公鵬年北溟文章事業為一代
偉人詩更瀟灑有絕句云隔簾幽韻上焦桐一曲湘
靈奏未終畧記年時春雨後海南初試小薰籠

與諸臣論樂律

康熙三十一年壬申正月初四日有 旨召內閣滿
漢大學士滿漢尚書左都御史吏部漢侍郎彭孫通
兵部滿漢侍郎朱都納李光地翰林院漢掌院學士

張英等入 上御乾清門 命禮書熊賜履兵侍李
光地學士張英近 御座 上指示諸圖論古今樂
律得失大旨以隔八相生爲合圍三徑一爲未合復
命侍衛鼓瑟教坊司吹管以驗之再試江南桐城監
生方正珠開方立方算法移晷而退方明崇禎庚辰
進士翰林簡討以智之孫也隔八相生謂宮一徵二
商三角四羽五變宮六變徵七八復爲宮李少司馬
云自昔論樂律諸家無人研究及此

不食特殺應制詩

上南巡山東巡撫王國昌進海物侍衛傳 旨朕從

不用海物每日止用二盞味俱淡素又不食特殺國
昌進活鹿發還翌日又進全鹿一具 上命侍衛查
驗鎗痕恐係特殺不收高士奇鳳池集載山東蔣陳
錫文生德水恭紀詩云鹿脯何曾減鳳麟須知特殺
不沾唇諸花作膳逾珍饌且免天厨近玉宸

不吃烟應制詩

上南巡駐蹕德州命侍衛傳 旨朕平生不好酒未
能飲一觴總是不用最可惡的是用烟諸臣在圍場
中看我竟日曾用烟否每見諸臣私行在巡撫帳房
偷吃真可厭惡且是耗氣的東西不但我不吃烟

太祖 太宗 世祖以來都不吃烟所以我
 最惡吃烟的人鳳池集蔣陳錫德水恭紀詩云碧梳水漿
 漱灑開肆筵先已戒深杯瑤池宴罷雲屏敞不許人
 間烟火來皆紀實也

淡墨錄卷七

蜀綿 李調元 兩村

一目人

康熙三十三年丹徒裴之仙偕數友入都會試有善
 亂者延之問中否仙判一貴字衆不解再叩之則曰
 皆判明矣榜發之仙中會元餘皆落第之仙眇一目
 始悟向所判乃中一目人也

雙丸

上元胡任輿康熙辛酉江南解元少嘗夢登高山手
 摘香櫞二顆作詩記之有手弄雙丸天下小句至康

熙甲戌大魁其言果驗是科榜眼為江都顧圖河探
花為海寧顧悅履

癸酉三鼎甲

康熙癸酉順天鄉試十八名為顧圖河十九名為姜
宸英二十名為查慎行三人聯名皆入翰林異事也
而甲戌顧圖河榜眼丁丑姜宸英探花庚辰汪繹狀
元皆癸酉同榜又一異也

文端筆記

高安朱文端少讀書不與會飲師命爨夫遺酒肉置
座間若不見聞者每見古大儒名臣循吏之行輒筆

記之康熙癸酉領鄉試第一甲戌進士改庶吉士學
國書啟館以知縣用選潛江行取刑部主事歷官吏
部尚書雍正癸卯二月奉 旨命偕張文和王順天
天鄉試九月會試仍偕文和總裁並 諭不拘朕定
進士一百八十名名數不拘省分不限額數有可取
佳卷選出另行具奏其信任如此官文華殿大學士
年七十二

乞假讀書

甲戌進士鑲白旗高其倬字張之改庶吉士即乞假
歸閉戶讀書數年然後就職卒為名臣官至戶部尚

書其功業于督雲貴尤著卒謚文良有味和堂集

補館選

陳夢球同安人籍隸正白旗康熙甲戌進士初未列入館選 上特名試聖人之本論一篇稱 旨補選庶吉士按王士禛居易錄云是科館選四十人前此未有也而沈廷芳館選錄止三十九名列夢球于二十二名其附後者法海也蓋云自汪俛至法海止三十九人舊錄末尚有殷元福河南新鄉人然則殷其一矣

太極太虛論

晉江陳遷鶴字介石康熙甲戌進士選庶吉士時安溪李文貞爲教習見所作太極太虛論驚曰經生中有是人耶引與辨論每至夜分人皆異之

豹仙

李蟠字仙李徐州人以文望雄於鄉跌宕自喜有趙翁者與李村相望晨夕過從趙富于貲小築數十楹中分兩院而空其半花木幽秀忽有美髯老人從空窟曳杖出自號豹仙揖翁入其室則屏幃几案之精皆非素有自云從天台來見君有閒館暫頓婢妾於此當圖報也徐有美姬出見皆光艷照座趙翁遂日與

欵洽叩以禍福無不奇中鄉曲皆以真仙奉之蟠獨不信一夕痛飲極醉直造豹仙所大呼妖獸數其惑衆之罪豹則早已避去其室間如而蟠仍毒詈不止也趙翁聞急令人扶歸明日豹仙復見趙諷曰吾友無狀深獲罪於老仙幸恕醉人豹仙曰此君天祿甚高老夫輩法當退遜計其年滿三十當魁天下四十六歲位至三公但其生平有二隱事干天罰功名雖顯不免淹阻老夫既被譴驅無庸留矣辭別出門有頃過覘其居依然空院也蟠孝廉時嘗夢神人衣冠甚偉手一盒子付之其中有黃金絲糾結成狀元二

字後康熙三十六年丁丑第一甲第一名進士及第授修撰充順天鄉試主考官以科場弊遣戍

榜眼不利楚

嚴虞惇榜姓張字寶成華亭人康熙三十六年丁丑榜眼授編修充湖廣主考官卒于楚人言翰林學差典試赴湖廣者多不利于榜眼辛未吳 毋甲戌顧圖河丁丑嚴虞惇皆榜眼也皆卒于楚

老名士

姜宸英字西溟慈谿人工古文 上禁中知其與朱葵尊嚴繩孫稱三布衣而屢赴鄉試輒不見錄用薦

人史館支正七品俸纂修明史分撰一統志月給餐錢依儒生衣雜坐公卿之次丁卯順天首場已擬第二以黜竄堯典舜典語為監場御史所貼已巳冬徐乾學告歸 詔許以書局自隨乾學 上言請以宸英相助許之始于三十六年丁丑會試中式時年已七十矣殿試初擬汪士鋐一甲第二張虞惇第三宸英名在二甲第四及讀卷 上閱試策進呈十卷中有浙江姜宸英乎時內閣學士韓菼對曰宸英在史館久識其字蹟第八卷當是也 上曰老名士也積學能文至老猶篤可拔置第一甲第三名為天下讀

書人勸于是移虞惇第二移士鋐二甲第一宸英一甲第三授編修已卯充順天鄉試同考官正主考李蟠丁丑同年同館生也場中舞弊宸英遂為所累牽引入獄審實蟠遣戍宸英竟卒于獄

兄弟三翰林

汪士鋐原名僕號退谷長洲人善法書行楷康熙三十六年丁丑進士初殿試讀卷擬士鋐一甲第二張虞惇第三姜宸英名在二甲第四 上知宸英久拔置一甲第三遂移士鋐傳臚改庶吉士授編修官右春坊右中允著有秋泉居士集初順治間有徽州汪

澆墨錄
日衡元且夢行天榜會元汪士鋹日衡改名應之竟
終身不第直至是科汪退谷中會元榜名士鋹相隔
四十餘年日衡死久矣其孫記乃祖之言以告人相
與嘆造物弄人亦覺無謂見子不語兄份字武曹康
熙癸未進士倓字安公康熙癸未進士皆官編修兄
弟三翰林人傳為盛事

吳三桂

徐容字顓中號个臣海鹽人父穰字荀三能詩善書
容庠生癸酉秋偕叔同年赴省試後詣于墳祈夢是
夕容夢忠肅公問汝祈何事容曰敢問秋闈中否公

顧吏持文冊來閱畢問容曰汝中矣示以冊上批清
晰二字且曰歸語汝祖吳三桂一事當報汝甲第也
醒語其叔亦不解所謂既而榜發容果入彀謁其本
房闈中批語並無清晰字及主司判試律進呈選春
秋墨義一篇其批適與夢合因共駭然而終不悟所
謂吳三桂者復詢其祖時年已及髦亦茫然不記久
之嘆曰是矣此事汝父亦不知之吾曩有僕姓吳有
婢名三桂因通姦汝曾祖治之幾瀕于死吾力為解
勸卽以三桂配吳已三十餘年矣不謂為神明所鑒
貽福于汝冥冥之中因果殆不爽也見信徵錄

自稱為儒

李鳳翥建昌人康熙三十六年丁丑進士改庶吉士授編修四年差調安徽學正歷官至工部侍郎雍正七年五月奏賀瑞芝木內自稱蓬華陋儒賀慶云又稱擲地才疎敢含毫而賦五色上以李鳳翥既以儒者自居則陳奏本章自應加意慎重不當作游戲之詞若未曾作賦而云作賦則所奏盡屬虛文若實曾作賦便當進呈朕覽若自知不能而作浮詞湊成自謙之語陳于君父之前豈儒者之道乎李鳳翥受朕深恩由翰林擢至工部侍郎不能卓然自立聽阿

其那指揮尙得以儒者自命乎更可異者貼黃內大賚賚字訛寫賚字莫非有意譏朕不應賚而賚乎似此輕慢疎忽儒者固當如是乎此二本著李鳳翥明白回奏

詩識

休寧汪繹玉輪康熙丁丑會試第三庚辰殿試第一癸未會試以修撰充同考官查慎行出其門乞養親歸乙酉命校全唐詩于揚州事竣而卒先是臚唱日馬上口占詩有歸計詎謀千頃竹浮生只辦十年官旬竟符其識著有秋影樓詩是科榜眼寶應季愈探

花柘城王露王阮亭云曾見愈書法知其必爲獨甲
果然王露與甲辰李元振兩榜眼皆出柘城亦盛矣

庚辰二名相

康熙庚辰科二名相一桐城張文和廷玉雍正四年
進所著性理一書 上諭此書發明聖賢之義蘊爲
後學之津梁有益于身心有關於品誼凡屬士大夫
皆當身體力行服膺勿矢可傳諸翰林知之又奉勅
纂修明史三百三十二卷積十有五年而成義例爲
唐宋以來諸史所不及一溧陽史文靖貽直官至侍
郎雍正七年 命赴閩審革臬喬學伊一案 上命

貽直往教道督臣高其倬撫臣劉世明遵 旨教道
至閩奏述其語有大凡人臣事君不但當以身事更
當以心事此心惟知有君而不知有人此心惟知有
君而並不知有己甚合 上意 硃批云高其
倬劉世明能從與否尙需觀其後效朕先慶得一其
爲股肱之史貽直矣累奉使命正直不阿 上益信
之又命總督江南其本籍也張史俱官至大學士而
史于乾隆庚辰畢沅榜諸進士瓊林宴年已八十五
上命重赴瓊林以昭盛典古未有也其卒也袁枚
有詩云三台星折上公嗟中使傳聞卹典加少著公

袍才出學老依黃閣當歸家殊恩鄉里曾開府佳語
瓊林再看花六十六年享天祿人間何處說榮華蓋
紀實也

和尙還和

沈近思字闇齋錢塘人幼聰穎依靈隱寺諦輝和尙
延名儒課文遂入庠諦輝卽令還俗近思無歸徘徊
于西泠橋遇項丈識其非常延至舍妻以女遂登康
熙庚辰進士由知縣行取吏部郎歷官侍郎清介愈
烈雍正四年主江南試 上閱鄉試錄見策問性理
俱有原本交部議叙尋陞都御史五年丁未早朝出

端門若有所呵此時戶曹姚培和隨後問何言曰衙
役也實無一人人以爲神云見詩禮堂雜纂

四書聯

海寧查德尹嗣琛康熙庚辰進士由庶吉士至侍讀
學士著查浦輯聞自述云余兄弟初就外傳先君集
四書爲聯云毋自欺也不亦悅乎予集此類甚多記
兩聯云是爲馮婦也無若宋人然邱何爲是栖栖者
與子謂之姑徐徐云爾

六十大魁

寶應王式丹號樓村少負重名六十始登康熙四十

一年壬午舉人捷癸未會狀當鄉試已定解矣後得
吳楚琦卷改第六其實吳遠不逮王知三元尙有待
也

其實有

康熙癸未榜眼閩縣趙晉官編修辛卯偕左必蕃充
江南副主考先是有歙縣貢生吳泌求余繼祖買舉
議定銀八千兩先將金一百銀二千託巡撫葉九思
門生員炳徃求將金銀看過炳于八月初三假充九
思子于喬家人進見九思假稱泌係其表弟再三求
提拔並言銀九思言銀我不要我便中對房考說叫

他自己拿个記號來次早炳尋見繼祖在布政司書
辦李啟叔丈杜功德家寫關節係其實有三字放在
第一破題內炳照樣寫一小封于初七送與九思九
思知簾官涇縣陳天立是副主考親戚將關節交付
天立入簾卽面見晉言泌是其相好求中許銀五百
房考我自料理而泌卷落在句容縣王曰俞房內于
二十一日酉時天立見曰俞假言是趙主考託我曰
俞尋出泌卷見文字通順呈薦遂得中先是四十一
年揚州陳光奎于賑粥做內認得山陽縣方名遂相
往來後至光奎家見所作孔子登東山一節題文有

幾句好光奎遂託方名將所擬文埋場內適名入簾光
奎卷適在各房遂呈卷得中名向光奎言及曾借商
銀八百屬其代還光奎許諾當是時兩鹽商子弟齊
中衆口沸騰必蕃據場後風聞卽行 上聞先是上
科鄉試賄賂主考同考各官事發時李振鄴田耜置
重辟家產籍沒並刊通諭如再有不顧性命仍敢賄
買關節照此例治罪至是 上震怒命戶部尙書穆
和倫同三法司嚴加夾訊除九思病沒天立畏罪自
縊餘俱按律具題 奉旨趙晉王曰俞方名著卽處
斬吳泌余繼祖員炳李啟程光奎依擬應絞監候秋

後處決左必蕃雖行題泰但身爲正主考不能鑒別
文字又不能隄防弊竇而于吳泌文章發刻關節內
其實有二字刪去二字毫無知覺着革職見例案全
集晉字書山王禎門人卜其必登鼎甲云

癸未鼎甲不利

康熙癸未鼎甲多不利會狀王式丹官修撰以同年
生科場事發牽連對簿久而得白未幾辛榜眼閩趙
晉以編修充江南副主考通關節伏誅探花武進錢
名世官侍講以詩諂年羹堯 上賜名教罪人扁子
家並 命在廷諸臣作詩以刺頒行天下學宮命地

方官嚴行約束不許生事

烟波釣徒

海寧查慎行初名嗣璉以字行康熙癸未進士選庶吉士時胞弟嗣琛官編修族姪昇官諭德時稱三查是年六月 上賜鮮魚慎行紀恩詩有笠簷簑袂平生夢臣本烟波一釣徒句稱 旨一口忽奉內傳烟波查翰林蓋時有查昇侍行故以別之十八日駕幸釣臺 名慎行赴 皇太子行幄釣魚 東宮舉前烟波釣徒句以示近侍慎行和詩復有烟簷雨笠尋常事慚愧猶蒙記憶中一時傳為佳話

義門善本

長洲何屺瞻焯少而奇穎為曹秋岳王言遠器重以崇明學生拔入太學壬午 聖祖冬狩至涿州時李文貞公侍直 上從容問曰野寧有遺賢乎公以焯對 名試 賜舉人直南書房禮部會不第復欽賜中式殿試二甲第三名選庶吉士命侍讀員勒府散館再留丁艱甲午以文貞公再薦始授編修明年有以蜚語中傷者 上自熱河沿途問焯安在卽收之 命索所著黏籤以閱書夾中有却吳縣餽金一札藁並呈 上閱怒稍霽摘數條遣內侍賞獄

呵問反報乃薄其罪僅坐免官年六十二卒。上問
不怡久之曰何焯勤學深可憫傷還其官贈侍讀學
士並賜予葬焯于經史閱觀博考而貫之以一善
校讐必得善本對乃已書法精妙人得之以爲拱壁
學者稱義門先生

文肅不養戲

蔣文肅公廷錫號南沙常熟人父康熙癸丑進士官
河南副使生二子長陳錫乙丑進士官雲貴總督謚
文恭二卽文肅也癸未欽賜二甲第四名進士官
至文華殿大學士工繪花卉與惲南田敵貴後宮中

極重之大抵以逸筆寫生而風神生動非識超胆大
筆有仙韻者莫能爲之其他有設色極工者皆其客
潘所作性愛士一藝可觀者皆羅致門下指授之故
真本絕少馬扶曦父子代作卽可亂真也文肅家教
甚嚴從無演戲觴客之事沒後十年子孫稍近伶人
至文恪公時老奴顧升力慫恿之文恪心動忽見顧
升以身穿三椅脚如受桎梏久乃瘦云見老主人坐
堂上責曰吾遺訓爾豈不知乃勸五郎蓄戲子著打
四十活掩棺中正悶絕不知所爲不知何以得出示
其髻果有青黑痕見子不語

二十三試皆第一

長洲吳廷禎字山掄少試有司二十有三皆第一顧
不中夢泥金報至捷第八名丙子乃入陝西籍得雋
又以冒籍出已卯 聖祖南巡召試第一 欽賜
舉人癸未殿試二甲第五合一甲適符夢兆官至諭
德戊子充江西主考李穆堂級實領解焉

重修孔廟

海寧陳文勤公世倌字東之康熙癸未進士由編修
歷官至山東巡撫雍正甲辰六月闕里孔廟災
上命世倌修廟始遵 旨正殿用黃琉璃瓦兩廡用

綠琉璃瓦以黃瓦鑲砌屋脊供奉 聖像選內務府
匠人到東用脫胎之法敬謹裝塑 欽定大門曰聖
時二門曰弘道八月 聖像成辛亥九年復命世倌
監修孔林去聖墓四十餘步陷出一穴廣尺餘內有
石榻榻上朱棺已朽有白骨一具甚偉旁置銅劍長
丈餘瑩綠色有竹簡數十頁皆蝌蚪文取視成灰世
倌以墓尙在孔子之先加石封之爲設少牢之禮焉

愚忠

雍正四年六月 上命世倌濬吳松陳家渡松江府
知府周中鈇乘埽船隨世倌被水衝淹斃而世倌以

躍上岸獨免奏聞 上以爲愚忠聖人所不取然卹
典如故世倌官至大學士

祖孫會試同名次

清海宮懋言明偉璆孫偉璆明崇禎癸未會試中十
八名爲詩四房翰林李士淳首卷懋言至康熙癸未
會試中十八名亦爲詩四房編修李鳳翥首卷亦同
事也初懋言公車北上夢祖與之履覺而喜曰是祖
祖武之兆也果符其言

不利爛麪

康熙丙戌狀元王雲錦無錫人榜眼

寓爛麪

衡術卒先是戊辰榜眼查嗣韓亦寓此卒人亦爲不
利于榜眼 雍正二年浙江呂畱良柔起剗尸呂
葆中卽呂子亦榜眼寓此卒探花爲高郵賞國維

桐城方靈臯苞康熙乙酉解元丙戌會試中式未殿
試 欽賜中允累陞閣學辛卯以序戴田有南山集
被逮詔獄減死論戍 上憐其才釋不遣令赴館修
書苞朱竹垞典故試江南所取元也 上命選制義頒行

夢植侯

無錫稽曾筠字松友康熙丙戌進士改庶吉士歷官

兵部左侍郎 雍正元年總督南河至中牟將築隄
東岸夢有堯牟而短鬚者直入一揖遂上坐曰某隄
須築某所才保無虞若在此不能成功稽頷之已而
思其人狀貌乃一武夫言復椎魯何以公然抗禮意
頗不懌叱叱而醒次日上工次過張桓侯廟小住啜
茶上塑神像宛然夢中人乃命停工卒諡文敏

一榜二名畫

俞兆晟字叔穎海鹽人康熙傳臚傳臚者二甲第一
名也由侍講學士督學江南諸生晉謁如先生禮論
文外兼及詩畫以二者皆素所長也官至閣學兆晟

畫兼水墨花草擅白陽胥山樵之勝得者無不珍之
同榜馬豫字觀我陝西綏德人由侍讀學士督學浙
江善墨竹脫去時習枯竿新筍各有風趣破石水澗
亦佳間作白衣大士像清寂而莊督學時屬員士子
慕墨妙者無不饜其意去俱見畫徵錄一榜二名畫
亦奇矣

館選分省

向例館選不分省以至邊省多缺李鍾戡字雪原四
川通江人康熙甲戌進士由庶吉士官太常寺少卿
雍正四年疏言康熙四十五年至六十年七科不分

省分大小俱有庶吉士元年癸卯漢軍及河南四川
進士無館選者二年甲辰科蒙古及山西河南陝西
湖南四川廣東廣西雲南貴州進士俱無館選之人
請廣儲才之路 上交部議准行今館選各省皆有
自鍾峩奏准始也

內翰林

高郵賈國維工書法侍書 內廷食內俸 上常以
內翰林呼之登順天鄉榜以籍貫被劾蒙 恩賜復
會試落第又蒙特 賜遂中探花

省分大小俱有庶古士元年癸卯漢軍及河南四川
進士無館選者二年甲辰科蒙古及山西河南陝西
湖南四川廣東廣西雲南貴州進士俱無館選之人
請廣儲才之路 上交部議准行今館選各將皆有
自鍾表奏准始也

內翰林

高郵賈國維工書法侍書 內廷食內俸 上常以
內翰林呼之登順天鄉榜以繕貫被劾蒙 恩賜復
會試落第又蒙特 賜遂中探花

